

856
歷代名家尺牘

明 代 尺 牘

上海文 明 書 局 印 行

上海
圖書館
藏書

上海图书馆藏书



A541 212 0023 80058

歷代名家尺牘例言

書啓牋簡名目不一綜覈義實各有隸屬茲從周氏尺牘新鈔吳氏昭代尺牘例以定厥名較爲普通

本編之選注重文學專集總集刊本抄本博覽約取甄錄綦嚴

自周迄清年歷綿遠由質趨文由簡趨繁風會使然各有佳妙不得歧視每編簡首附以小傳論世知人不無裨益

言理言情言事論古論政論文短長兼錄駢散並收一編之中無體不備評論陋習未敢因依祇加圈點利便誦讀見仁見知會心不遠是在善學刊本相沿魯魚亥豕不無訛奪一字之類一句之疵灼知其誤或勇改之或逕刪之要以無碍上下語氣爲斷

卷頁多少各編不同或合數代爲一編或分一代爲上下卷短祚之朝采錄不多

歷代名家尺牘 例言

以次附後要於應有盡有

歷代名
家尺牘

明代尺牘序

明代尺牘夥矣成弘以前寥寥可數成弘以還崆峒恢體製於前太原揚風徽於後袁徐分驪而馳艾陳奮袂而起往往一字之譌一言之歧宗旨不同論難多方至翰札數十易而猶斷斷不已者文人好事動輒齟齬殊無謂也本編所選不多大半爲有關係之作如陽明答毛憲副書與安宣慰書衡山之與郡守王肅齊書子畏之與文衡山書用脩之謝歐陽書子相之報劉一丈書荆川之與楊椒山書閣部之復多爾袞書宋氏之寄母書或表孤忠或達孝思或矢介節或守孤貞或斥奸佞之炎勢或聲春秋之大義使讀之者動魄驚心忽悲忽喜不能自主不僅元美之工於摹古元成之善於運典爲足盡翩翩之能事也區區瞥見略述於此

民國十六年五月吳興王文濡識

明代尺牘序

明代尺牘目錄

- 上熊提控書 與蕭鵬舉書 以上劉崧 答俞景文書 方孝孺 與楊東濱書
又與楊東濱書 以上陸深 奉遂菴先生書 又奉遂菴先生書 以上李夢陽
與康對山書 霍韜 答毛憲副書 與安宣慰書 與劉元道書 以上王守仁
與郡守肅齋王公書 文徵明 與文徵明書 上吳天官書 以上唐寅 答李給
事同野書 劉繪 寄屠漸山書 陳東 與李子儀書 謝陳雙山書 以上錢薇
與岳厚夫書 陸燾 謝卻嫻友祝年書 羅洪先 答胡柏泉書 答葉教諭書 以
上薛應旂 與張雙鶴論王戴兩家解仇書 莫如忠 與吳宗高書 汪道昆 與
徐用先書 與歐陽子重都憲書 謝歐陽子重書 與金鶴卿書 以上楊慎
與林戶部世觀書 與安膠陽書 與吳泉濱書 以上王慎中 復沈萬川會昌
大尹書 復周一陽主事書 以上海瑞 與徐子言書 與沈敬甫書 以上歸有

光 致汪伯玉書 致李伯承書 與王宮諭書 與黃淳甫書 以上王世貞

報劉一丈書 報王元美書 報李于鱗書 以上宗臣 答李長公書 徐渭 與

華郎中補菴書 與楊椒山書 與安子介書 與卜無錫書 以上唐順之 復

丹徒邑諭唐白野書 茅坤 約同人刻未見書啟 李日華 答俞連山書 張元忭

答王對南相公書 答鄒南皋吏部書 以上申時行 與陳兵使書 與李師

書 與戴謙甫書 上王座主老師書 上六兄杜陵書 以上馮時可 與蕭允

升祭酒書 袁宏道 答周象賢書 與邵侍御書 又答戚都護書 以上余寅

答沈虎臣書 姚希孟 答賀藩伯澹菴書 答湖廣巡按朱謹吾辭建亭書 以上

張居正 與某幕府啟 陸可教 答傅商盤書 趙南星 答沈將軍書 答朱座

師書 答范異羽書 以上董應舉 與沈箕中書 與沈君典書 與呂玉繩書

與陳立甫書 以上屠隆 與郭篤卿書 鍾惺 上家大夫書 與屠緯真先生

書 報吳允兆書 上敬菴許公司馬書 以上茅維 答陳赤寰書 熊廷弼 與

高景逸總憲書 周順昌 與葉園適書 高攀龍 與孟雲浦文選書 與鄧定宇
書 以上鄒元標 報謝伯子書 黎遂球 辭建坊啓 秦鎬 示門人饒子正書 章
世純 與友書 范景文 與會稽陸公子書 陳子壯 讓馬瑤草書 王思任 復
清多爾袞書 與金正希書 與雲間諸紳書 以上史可法 與譚友夏書 金聲
寄母書 宋氏

明代尺牘作者小傳

劉崧泰和人初名楚字子高七歲能賦詩以明經薦歷官職方郎中北平按察副使禮部侍郎權吏部尙書尋致仕歸自號槎翁後復召拜國子司業卒諡曰恭介有槎翁詩文集

方孝孺寧海人字希直一字希古洪武間授漢中教授建文時爲侍講學士燕王入南京命孝孺草卽位詔不從被磔於市夷十族孝孺工文章以闢異端爲己任名書室曰正學學者稱正學先生著有遜志齋集

陸深上海人初名榮字子淵號儼山弘治進士嘉靖中爲太常卿兼侍讀世宗南巡掌行在翰林院印進詹事府詹事卒諡文裕有儼山集等書

李夢陽慶陽人徙開封字獻吉弘治進士授戶部主事後官江西提學副使以事奪職夢陽工詩古文與何景明徐禎卿等號十才子有空同子集

霍韜南海人字渭先始號兀厓後更號渭厓正德進士告歸讀書西樵山世宗卽位除職方主事後官禮部尙書卒諡文敏著有渭厓集等書

王守仁餘姚人字伯安弘治進士正德時巡撫南贛平大帽山諸賊定宸濠之亂明世文臣用兵未有如守仁者卒諡文成嘗築室陽明洞中學者稱陽明先生有王文成全書

文徵明長洲人初名璧以字行更字徵仲別號衡山正德末以歲貢生詣吏部試授翰林院待詔世宗預修武宗實錄侍經筵未幾乞歸年九十卒徵明詩文書畫皆工而畫尤勝著甫田集

唐寅吳縣人字伯虎一字子畏號六如弘治中鄉試第一寧王宸濠以厚幣聘之寅察其有異志佯狂使酒宸濠不能堪放還寅畫入神品兼工詩文有畫譜及集

劉繪光州人字子素一字少質好擊劍力挽六石弓舉鄉試第一登嘉靖進士授

行人改戶科給事中兩劾夏言言憾之出爲重慶知府有嵩陽集

陳東鄞人字約之號后岡嘉靖進士授禮部主事與王慎中唐順之等稱嘉靖八才子忤霍韜張璁以編修出爲湖廣僉事累擢湖南提學副使再疏求去不得縱酒嘔血死有陳后岡詩文集

錢薇海鹽人字懋垣嘉靖進士由行人擢禮科給事中因星變極言主失世宗深銜之已又疏諫南巡斥爲民旣歸務講學足跡不及公府有承啓堂稿

陸粲長洲人字子餘嘉靖進士補工科給事中勁挺敢言以爭張福達獄下詔獄廷杖尋疏論張璁桂萼謫貴州都鎮驛丞遷永新知縣善治盜姦猾屏跡以念母乞歸母歿毀甚未終喪而卒

羅洪先吉水人字達夫號念庵舉嘉靖進士第一卽請告歸後召拜春坊左贊善罷歸卒諡文莊有念庵集

薛應旂武進人字仲常嘉靖進士屢遷南京考功郎中忤嚴嵩謫建昌通判歷浙

江提學副使以大計罷歸有宋元資治通鑑等書

莫如忠松江華亭人字子良嘉靖進士累官浙江布政使有崇蘭館集

汪道昆歙人字伯玉嘉靖進士令義烏教民講武人人能投石超距世稱義烏兵
後備兵閩海與戚繼光募義烏兵破倭寇擢司馬郎累官兵部侍郎乞養歸有
副墨及太函集一百二十卷

楊慎新都人字用修號升菴正德間廷試第一授修撰世宗時充經筵講官以執
議大禮遣戍雲南永昌記誦之博著述之富推爲明代第一詩文雜著一百餘
種有升菴集八十一卷天啓初追諡文憲

王慎中晉江人字道思初號遵巖居士後號南江嘉靖進士授禮部主事後官河
南參政以忤夏言落職歸古文與唐順之齊名有遵巖集

海瑞瓊山人字汝賢嘉靖舉人官戶部主事時世宗專意齋醮瑞上疏切諫下詔
獄穆宗立得釋遷右僉都御史巡撫應天未幾謝病歸張居正當國嚴憚之中

外交薦卒不召居正卒帝乃召瑞爲南京右都御史卒於官贈太子太保諡忠介

歸有光崑山人字熙甫九歲能屬文累試不第徙居嘉定安亭江上讀書授徒晚成進士授長興令隆慶中爲南京太僕丞著有震川集

王世貞太倉人字元美自號鳳洲又號弇州山人嘉靖進士官刑部主事後累官刑部尙書移疾歸世貞始與李攀龍狎主文盟攀龍沒獨主壇坫者二十年有弇山堂別集等書

宗臣揚州人字子相嘉靖進士由吏部考功郎歷稽勳員外郎後出爲福建布政參議卒年三十六有宗子相集

徐渭山陰人字文長一字天池嘉靖時諸生天才超越詩文書畫皆工常自言吾書第一詩二文三畫四識者肆之晚又號青藤有徐文長集

唐順之武進人字應德嘉靖中會試第一以破倭寇功擢右僉都御史巡撫鳳陽

力疾渡焦山至通州卒著有荆川集崇禎中追諡襄文

茅坤歸安人字順甫號鹿門嘉靖進士善古文又好談兵累官廣西兵備僉事破
猺賊十七砦遷大名副使爲忌者所中落職所選唐宋八大家文鈔行於世其
集曰白華樓藏稿玉芝山房稿耄年錄

李日華嘉興人字君實號竹懶又號九疑萬曆進士官至太僕少卿工書畫精鑑
賞世稱博物君子王惟儉與董其昌並而日華亞之著有書畫想像錄竹懶畫
媵六研齋筆記等書

張元忭山陰人字子盡別號陽和隆慶進士官至翰林侍讀好讀書以氣節自負
其學篤信王守仁而究不出於朱熹卒諡文恭有紹興府志不二齋文選等書
申時行長洲人字汝默嘉靖進士授修撰以文字受知張居正萬曆中累官吏部
尙書繼張四維爲首輔政務寬大世稱長者求罷歸卒諡文定有賜閒堂集

馮時可松江華亭人字敏卿號元成隆慶進士官至湖廣布政使參政著述爲當

時所重有左氏釋左氏討等書

袁宏道公安人字中郎萬曆進士官稽勳郎中與兄宗道弟中道並有才名其詩矯王李之弊倡以清真然以識解多僻頗爲通人所譏有袁中郎集

余寅鄞人字君房晚年改字僧杲萬曆進士官至太常寺少卿有乙未私志同姓名錄農丈人文集

姚希孟吳縣人字孟長萬曆進士授翰林檢討立朝持清議楊所修劾其爲繆昌期黨削籍崇禎中赴召以庶子充講官溫體仁忌之出爲南京少詹事卒諡文毅有循滄集

張居正江陵人字叔大別號太岳嘉靖進士穆宗時與高拱並相神宗時代拱爲首輔飭吏治整邊備爲相十年海內稱治卒諡文忠有太岳集

陸可教蘭谿人字敬承萬曆進士以編修掌誥敕累官右宗伯以亮節稱父喪以毀卒

趙南星高邑人字夢白萬曆進士歷文選員外郎上疏陳四大害觸時忌乞歸熹宗時爲吏部尙書澄清吏治引用羣賢爲魏忠賢所忌矯旨削籍戍代州卒崇禎初贈太子太保諡忠毅有史韻學庸正說

董應舉閩縣人字崇相萬曆進士天啟間官太常少卿陳急務數事擢太僕卿兼河南道御史經理天津至山海屯務成效大著改工部侍郎兼戶部侍郎并理鹽政巡鹽御史惡其侵官劾之因落職崇禎初復官應舉居官慷慨任事在家好興利捍患比沒海濱人祠祀之

屠隆鄞人字緯眞一字長卿萬曆進士除潁上知縣調青浦遷禮部主事罷歸家貧賣文爲活以終

鍾惺竟陵人字伯敬萬曆進士授行人稍遷工部主事尋改南京禮部進郎中擢福建提學僉事以父憂歸卒於家與同里譚元春評選唐人之詩爲唐詩歸又評選隋以前詩爲古詩歸當時謂之竟陵體

茅維坤少子字孝若能詩與同郡臧懋循吳稼澄吳夢陽並稱四子嘗詣闕上書
希得召見陳當世大事不報

熊廷弼江夏人字飛百萬曆進士官至兵部尙書經略遼東時清兵屢犯邊廷弼
籌布置三方之策以廣寧巡撫王化貞不受節制大敗入關爲馮銓等所譖棄
市傳首九邊遠近莫不嗟憤

周順昌吳縣人字景文號蓼洲萬曆進士天啟中歷文選員外郎署選事以忤魏
忠賢爲其黨所誣陷下獄死崇禎初諡忠介有燼餘集

高攀龍無錫人字存之萬曆進士官至左都御史與顧憲成同講學於東林書院
時稱高顧爲崔呈秀構陷投池而死崇禎初諡忠憲有高子遺書

鄒元標吉水人字爾瞻別號南皋九歲通五經舉萬曆進士累官刑部右侍郎與
馮從吾建首善書院集同志講學時魏忠賢方竊柄傳旨謂宋室之亡由於講
學加以嚴譴乃力求去位卒崇禎初諡忠介有願學集

黎遂球番禺人字美周崇禎舉人工詩古文辭善畫山水禮部侍郎陳子壯以經濟名儒薦因母老不就甲申變後子壯復薦之唐王遂出受兵部職方司主事提督廣東兵赴援贛州城破死之諡忠愍有蓮鬚閣詩文集

秦鎬汝陽人字子京性至孝家貧絕意仕進肆力古文辭崇禎中詔徵之不就後流寇陷城脅之不從絕粒死年八十二有髣園銷夏錄

章世純臨川人字大力舉天啟鄉試崇禎中官柳州知府聞京師變悲憤遘疾卒有治平要略章柳州集

范景文吳橋人字夢章號思仁萬曆進士選員外郎天啟間爲文選郎中謝病去崇禎間起用累官工部尙書兼東閣大學士入參機務李自成陷京師死之贈太傅諡文貞有大臣譜及遺集

陳子壯南海人字集生號秋濤萬曆進士授編修天啟末典浙江鄉試忤魏忠賢削籍崇禎初起故官累遷禮部右侍郎以言事除名下獄永明王立於肇慶授

東閣大學士兼兵部尙書率師攻廣州被執不屈死諡文忠有雲淙集

王思任山陰人字季重號遂東萬曆進士累遷袁州推官有能聲魯王監國時歷禮部右侍郎郡城失守遂隱居不仕有弈律百家論鈔

史可法祥符人字憲之一字道鄰崇禎進士福王立以兵部尙書大學士督師揚州清帥勸之降拒之城陷被執不屈死葬袍笏於郡城梅花嶺後人稱爲史閣部諡忠靖清乾隆中追諡忠正有史忠正集

金聲休寧人字正希崇禎進士授庶吉士乞面陳急務帝卽召對平臺不用遂乞歸福王立南京超擢左僉都御史不起南都陷糾集義勇分兵扼六嶺復遣使通表唐王授右都御史總督諸道軍爲清所執不屈死諡文毅

明代尺牘小傳

明代尺牘

上熊提控書

劉崧

僕聞天下之事。有似緩而實急。似輕而實重者。墳墓爭訟之說是也。故士君子切所究心焉。自世降兵興以來。三綱淪矣。九法斁矣。弱肉強食。張頤鼓吻。而吞噬者相望於道。至殺人之父兄。殘人之子弟。顧亦何所不有。然且莫或慘於墳墓之侵奪。何也。彼死者。既不能以自白於世。而世方以輕且不急視之。故朽骨抱無涯之冤。而世道人心之變益可概矣。夫祖宗不能自保其墳墓。而付之後世子孫。以子孫能守之也。爲子孫而不能守。則非其子孫矣。尙何面目以食息於人世哉。僕也有祖宗之故墓。在雲亭萬山之間。自其十歲能行步以來。先人每提攜之。往拜掃其下。指而示之。其山名某某也。某墳葬某某也。固嘗入乎耳。熟乎目。而銘乎心矣。斯地也。蓋先世守之以遺先祖。先祖又守之以遺先人。先人又守之以遺於不肖。



誠非身外至也。非掩而得之也。今一旦爲有力者侵而有之。得不舉首痛心哀鳴。疾呼以告於當世之仁人君子。敬惟閣下以宰相之尊。領方面之寄。凡民之有求而不得。有憤而不伸者。必閣下之是歸。而閣下仁足以植善。明足以燭奸。勇足以止暴。又粲粲乎其有文也。斷斷乎其有守也。是固能不忍於一草一木之損傷者。而況於人之親乎。況於人之祖宗墳墓乎。故敢一哀鳴焉。僕也年四十有四矣。其足跡未嘗入於公府。其姓名未嘗挂於訟牒。而遑遑焉爲墳之是訴焉。豈得已哉。誠不忍以棄祖宗之藏。以負先人之託。不然痛憤之極。寧有長號而自絕者矣。惟閣下不以爲緩。且輕一引手。張目疾發。而明斷之名正分定。法施生人。恩及朽骨。世道幸甚。銜環結草。死生以之。再拜奉書。涕淚交隕。惟矜察幸甚。

與蕭鵬舉書

劉崧

某自六月來。有北平之行。奔走三千餘里。以八月二十一日到官。未幾僉事經歷分巡皆出。而區區以守司獨留。芒忽迂疎。百責叢萃。方日與胥吏較。朱墨程條。法

於故牘間其爲憂懼不啻履冰而集木也。今本司官舍乃前元御史臺高敞嚴邃。有古柏數十長廊廣蔭。晝無人聲。惟鳥鵲百千日暮翔集。喧聒不絕。每大風震呼。一雨卽雪。蕭然深山大林中景也。悶悶中雖欲求一二知己。少抒懷愫。不惟不暇。亦不敢。亦且不可得。惟日與庭下立。卒數輩擁卷兀坐而已。少晚公退。卽閉門。顧影一燈。熒熒夜必更盡。乃就枕。至四鼓雞鳴。又亟披衣起視事。若是者率以爲常。終不敢以外任而少肆也。自惟年齒已及。髭鬢欲衰。覺精力猶不愒乏。此殆習性。堅定而不侵於外物故耳。所幸者省府中多有官書。可以開看。苦無好茶。又井水鹹鹵。煎之則味奪而色變。所食米卽吾土所謂澁粟者。杭稻亦間有。然少鮮潔者。黍稷釀酒香味大不如南。一冬苦無青菜。人家多醃藏餅中。以待乏。北來非惟物性不同。人之飲食嗜好亦殊。故調和烹飪之節。往往牴牾。而阜隸輩又本農家子。椎魯粗鈍。殊不解人意。嘗欲自爲之。則俯仰掇拾之餘。已不勝其勞矣。而又似非所當爲也。故每食輟對案浩歎而已。茲遣人歸省。動定欲候家人輩過此。未審能

動否。想見費力也。

答公韶景文書

方孝孺

惠書以先夫人遺德未傳於世。而以銘文見屬。辭氣懇惻。厚甚。此固孝子仁人不忍死其親之美意。然某之言。豈足傳信後世哉。古之傳世者。雖不可勝舉。而其大較。皆豪傑之士。道德充溢於中。事功見於當時。爲天下所仰服。故其餘言緒論之所及。無意於傳。而後世自傳之。以其抑揚予奪。爲人之賢否。輕重有獲。箸其名於文章之籍者。輒相誇賀。以爲榮耀。至於子孫。猶倚藉爲口實。此皆以其人誠有可傳。而非特以其文也。今足下慮親之名未箸。而欲傳之。苟以其文。則某非能文者。苟以其人。則某之無能。別於衆人也。審矣。而望其信於今。垂於後。世何爲計之。過而求聞之。疏乎。且世之風俗。漓薄。視今之文。未論其工拙。先舒紙尾。覽官位爵秩。故求文章者。必於穹位隆爵之人。幸而得假其名。輒拜受。以去。不復問其中作何語。蓋習使然也。足下不於彼焉。求而以某使誠美可傳。亦將爲人所輕訕。冀世

俗之信且不能致而何望後世之傳乎使後世之人好尚與人異某佗日於道或有所成文或有傳未可知也使亦類今人之爲見某素賤士其身且不能自傳而安能傳乎人邪雖然以位而傳者猶器以丹漆而美也杞梓之器固有待於丹漆之飾其飾既亡而其美亦亡矣若夫金玉之器則不然其美天美也其貴天貴也人欲丹漆之且無所施而況有待於飾乎足下行義文學爲士子師於人不妄有所取而獨有取於某意者其相求於丹漆之外也與此之謂以古人之道見處而非汲汲於流俗之言也然則某亦安敢猥謂見棄於流俗而不勉乎銘墓之文謹如足下之命其可傳邪其無足傳邪其信於今邪其傳之後世而信邪足下有以取之其必有以識之矣某何敢知焉

與楊東濱書

陸深

僕夜歸宿山中晨起觀初日散影遙田滿地皆白雲以輓輿經過瀾漫靄靄俯見城郭此身真在天上須臾扁舟亂流如汎瀛洲還坐南檠映日從兒子寫漢書一

兩段方啜新稻飯一盃此樂恨不與東濱共之急足報去能乘興來此一話如何

與楊東濱書

陸深

唐橋夜別情感萬端深南來一行人皆賴尊庇粗適輕舟軟輿上下山水間如在畫圖不知身是遷客也入閩尤勝大都丹崖碧潭隨處而有身在橫嶂絕壁倚天卓立白雲英英卷舒其下每恨不强東濱來此爲之悵然履任正當木樨盛開山中老樹有兩人合抱繁陰蔽天清香數十里愧無少酒量酬之公廨在山椒四圍紫翠直一指顧間後有小園方亭流水時時燕坐耳目清淨可以忘老於此矣知之知之

奉邃菴先生書

李夢陽

張陶二客比數往來以是得聞起居爲詳爲慰某疑似之跡市虎成眞而勸臣遂以殺人媚人爲心鈎織窘辱無所不至幸素翁當道疑剖似解不費言說大誣明釋某嘗自鄙亦嘗自幸自鄙者疎亢弗容於時自幸者元老碩公取爲芟駕之馬

日爲磊砢之材也。某反觀私計，平生不敢爲汙下苟且之行，卽遭擠陷，不敢爲門牆玷也。

奉邃菴先生書

李夢陽

草莽中伏聞謝柄歸里，卑懷無任喜慰。比遇張先生言，眠食安健，門客往來者如常也。則又慰又喜。某私計不謁杖屨，奉道顏。今十年餘矣。雖耳警欬，目和眸，神馳心注，無殊曩昔。然悲離隔，慕親接於衷，莫之寬也。壯歲性狂膽，麓高視，獨行四方，是負意之所拂。投冠便往，以爲軒冕之耀，不若邱壑爲安。於是擬江左再圖，囊漢心勇跡阻，竟還舊棲。才弱成寡，自鄙自嗤。去年室人喪亡，子蠢孫孺，家事埤躬顛毛，漸種種矣。夙志謂何，臨鏡竊歎，邇卜域鈞州大陽山，其地泉石幽曠，想於茲焉。老矣，南望門牆，豈勝瞻戀。

與康對山書

霍 韜

生自小年，卽信對山空同爲今之豪傑也。及來京都，人則加訕言於兩君子者，喋

喋生乃詢之。呂仲木侯應乾乃知今日之爲訛者皆小人也。自李東陽妬忌海內賢才。論人則取其輒靡者。論文則取其絮爛者。一時賤儒鄙夫奔走其門。士習遂至極壞。而號爲自立有守者。率亦攣縮小器。沾沾硜硜而已。無怪乎百口一聲訛。詆對山空同也。生嘗語人曰。若輩呵訕康對山李空同。然兩君子者。視若輩譏呵猶溝渠中蠅蚊也。今之人保守祿位。如巧人之得簞食豆肉也。恨不一噉以飽。又復皇駭。顧恐他人旁奪之。兩君子者。視之不啻廁中鼠也。空同於詩文。猶少見本相。若對山被小人誣詆後。不惟不疏奏自直。且於京師交游。無半字相愬。於詩於文。不少見懟恨不平之氣。其視世之毀譽。何如也。故凡今之喋喋恨不擘頤禿舌短髻。兩君子者。不惟不足當識者一笑。適足以見其不肖。喪是非羞惡本心。爲可哀憐耳。今之人最號有識。亦必曰李空同尙氣傲物。康對山聲色自娛。生爲之解曰。今之世。居高官都要路者。烏得尙氣人哉。孟子曰。我善養吾浩然之氣。亦尙氣而已矣。說大人則藐之。亦傲物而已矣。古之人居危疑之世。各有所託以自垢。

蕭何。以田宅。淵明。以酒。豈淺士所可知哉。我國家百六十年。文明之運。宜有命世豪傑。出應其盛。或立勛業。追掩前轍。或續聖緒。垂式後人。文章氣節。不與也。尙冀珍重。爲生輩矜式。至願至願。用舍在時。雖孔孟不敢必生。雖處此去住久速。亦尙未定。何時得隨一面。以慰懷渴。家園十數年。必有制作。足以聳一代盛美。於隆古者。毋惜垂教。亦嶺海狂斐。願望之幸之一也。不宣。

答毛憲副書

王守仁

昨承遣人。喻以禍福利害。且令勉赴大府請謝。是非道誼深情。決不至此。感激之至。言無所容。但差人至龍場凌侮。此自差人挾勢擅威。非大府使之也。龍場諸夷與之爭鬪。此自諸夷憤慍不平。亦非某使之也。然則大府固未嘗辱某。某亦未嘗傲大府。何所得罪。而遽論謝乎。跪拜之禮。亦小官常分。不足以爲辱。然亦不當無故而行之。不當行而行。與當行而不行。其爲取辱一也。廢逐小臣。所守以待死者。忠信禮義而已。又棄此而不守。禍莫大焉。凡禍福利害之說。某亦嘗講之。君子以

忠信爲利禮義爲福苟忠信禮義之不存雖祿之萬鍾爵以侯王之貴君子猶謂之禍與害如其忠信禮義之所在雖剖心碎首君子利而行之自以爲福也況於流離竄逐之微乎某之居此蓋瘴癘蠱毒之與處魑魅魍魎之與遊日有三死焉然而居之泰然未嘗以動其中者誠知生死之有命不以一朝之患而忘其終身之憂也大府苟欲加害而在我誠有以取之則不可謂無憾使吾無有以取之而橫罹焉則亦瘴癘而已爾蠱毒而已爾魑魅魍魎而已爾吾豈以是而動吾心哉執事之諭雖有所不敢承然因是而益知所以自勵不敢苟有隳墮則某也受教多矣敢不頓首以謝

與安宣慰書

王守仁

某得罪朝廷而來惟竄伏陰厓幽谷之中以禦魑魎則其所宜故雖夙聞使君之高誼經旬月而不敢見若甚簡伉者然省愆內訟痛自削責不敢比數於冠裳則亦逐臣之禮也使君不以爲過使廩人餽粟庖人餽肉閩人代薪水之勢亦寧不

貴使君之義而諒其爲情乎。自惟罪人。何可以辱守土之大夫。懼不敢當。輒以禮辭。使君復不以爲罪。昨者又重之以金帛。副之以鞍馬。禮益隆。情益至。某益用震悚。是重使君之辱而甚逐臣之罪也。愈有所不敢當矣。使者堅不可卻。求其說而不得。無已。其周之乎。周之亦可受也。敬受米二石。柴炭雞鵝。悉受如來。數其諸金帛。鞍馬使君所以交於卿士大夫者。施之逐臣。殊駭觀聽。敢固以辭伏。惟使君處人以禮。恕物以情。不至再辱。則可矣。

與劉元道書

王守仁

來喻欲入坐窮山絕世故。屏思慮。養吾靈明。必自驗。至於通晝夜而不息。然後以無情應世故。且云於靜求之。似爲徑直。但勿流於空寂而已。觀此足見任道之剛毅。立志之不凡。且前後所論。皆不爲無見者矣。可喜可喜。夫良醫之治病。隨其疾之虛實。強弱寒熱。內外而斟酌。加減調理。補泄之要在去病而已。初無一定之方。不問證候之如何。而必使人人服之也。君子養心之學。亦何以異於是。元道自量。

其受病之深淺。氣血之強弱。自可如其所云者。而斟酌爲之。亦自無傷。且專欲絕世。故屏思慮。偏於虛靜。則恐既已養成空寂之性。雖欲勿流於空寂。不可得矣。大抵治病。雖無一定之方。而以去病爲主。則是一定之法。若但知隨病用藥。而不知因藥發病。其失一而已矣。閒中且將明道定性書熟味。意況當又不同。憂病不能一一信筆草草無次。

與郡守肅齋王公書

文徵明

夫聲聞過情。君子所恥。有損無益。賢者不爲。今大巡郭公。欲爲某建立坊表。出於常格。區區淺薄。豈所宜蒙。深有不自安者。自惟潦倒儒生。塵伏里門。又以衰病蹇劣。不能厠蹤士大夫之間。故擊斂退縮。非以是爲高也。今以爲賢於它人。郡士夫誰爲不肖。且某在今諸士夫中。名位最微。人品最下。行能才智。最爲凡劣。一旦以爲賢。而拔出其上。冒然居之。豈非君子所深恥。某雖不敢自託於君子。然亦安肯覩然無恥。甘於小人之歸哉。惟是憲府崇嚴。無由控訴。欲望明公轉達。此情得賜

寢罷。實至幸也。況今歲歉民窮。賦無從出。一有興作。不無動擾。此亦明公所宜軫念者。且某世居此里。自祖父父叔已來。世叨薄宦。里中父老。每爲贊喜。然於其人。實未嘗有毫髮蔭庇。萬一舉事。則匠作夫役。勞頓實多。夫不能覆庇。而反至勞頓。豈當時贊喜意哉。彼雖自受其役。而區區以一身標表之。故坐視其勞。亦何能安然。不爲之意哉。徒費財力。而又使人不安。正所謂無益而有損。竊爲明公不取也。區區此請。在於必得。若以爲非。出至誠。姑爲是退。託以邀冒時譽。則重得罪於左右矣。然而不敢避也。病忝不前。無緣躬叩鈴階。謹勒手狀。令兒子俯伏。以請。臨紙不勝願望之至。

與文徵明書

唐寅

寅白。徵明君卿。竊嘗聞之。累吁可以當泣。痛言可以譬哀。故姜氏歎於室。而堅城爲之墮。堞荆軻議於朝。而壯士爲之徵。劍良以情之所感。木石動容。而事之所激。生有不顧也。昔每論此。廢書而歎。不意今者。事集於僕。哀哉。哀哉。此亦命矣。俯首。

自○分○死○喪○無○日○括○囊○泣○血○羣○於○鳥○獸○而○吾○卿○猶○以○英○雄○期○僕○忘○其○罪○累○殷○勤○教○督○
罄○竭○懷○素○缺○然○不○報○是○馬○遷○之○志○不○達○於○任○侯○少○卿○之○心○不○信○於○蘇○季○也○計○僕○少○
年○居○身○屠○酷○鼓○刀○滌○血○獲○奉○吾○卿○周○旋○頡○頏○婆○娑○皆○欲○以○功○名○命○世○不○幸○多○故○哀○
亂○相○尋○父○母○妻○子○躡○踵○而○沒○喪○車○屢○駕○黃○口○嗷○嗷○加○僕○之○跌○宕○無○羈○不○問○生○產○何○
有○何○亡○付○之○譚○笑○鳴○琴○在○室○坐○客○常○滿○而○亦○能○慷○慨○然○諾○周○人○之○急○嘗○自○謂○布○衣○
之○俠○私○甚○厚○魯○連○先○生○與○朱○家○二○人○爲○其○言○足○以○抗○世○而○惠○足○以○庇○人○願○儕○門○下○
一○卒○而○悼○世○之○不○嘗○此○士○也○蕪○穢○日○積○門○戶○衰○廢○柴○車○索○帶○遂○及○藍○縷○猶○幸○藉○朋○
友○之○資○鄉○曲○之○譽○公○卿○吹○嘘○援○枯○就○生○起○骨○加○肉○猥○以○微○名○冒○東○南○文○士○之○上○方○
斯○時○也○薦○紳○交○游○舉○手○相○慶○將○謂○僕○濫○文○筆○之○縱○橫○執○談○論○之○戶○轍○岐○舌○而○贊○并○
口○而○稱○牆○高○基○下○遂○爲○禍○的○側○目○在○旁○而○僕○不○知○從○容○晏○笑○已○在○虎○口○庭○無○繁○桑○
貝○錦○百○疋○讒○舌○萬○丈○飛○章○交○加○至○於○天○子○震○赫○召○捕○詔○獄○身○貫○三○木○卒○吏○如○虎○舉○
頭○搶○地○洩○泗○橫○集○而○後○崑○山○焚○如○玉○石○皆○燬○下○流○難○處○衆○惡○所○歸○績○絲○成○網○羅○狼○

衆乃食人馬。斃切白玉。三言變慈母。海內遂以寅爲不齒之士。握拳張膽。若赴仇敵。知與不知。畢指而唾辱。亦甚矣。整冠李下。掇墨甌中。僕雖聾盲。亦知罪也。當衡者哀憐其窮。點檢舊章。責爲部郵。將使積勞補過。循資干祿。而遽絛戚施。俯仰異態。士也可殺。不能再辱。嗟乎。吾卿僕幸同心於執事者於茲十五年矣。錦帶懸髦。迨於今日。瀝膽濯肝。明何嘗負朋友。幽何嘗畏鬼神。茲所經由。慘毒萬狀。眉目改觀。愧色滿面。衣焦不可伸。履缺不可納。僮奴據案。夫妻反目。舊有猛狗當戶。而噬反視室中。甌破缺。衣履之外靡有長物。西風鳴枯。蕭然羈客。嗟嗟咄咄。計無所出。將春掇桑。樵有橡實。餘者不迨。則寄口浮屠。日願一餐。蓋不謀其夕也。吁。歎乎哉。如此而不自引決。抱石就木者。良自怨恨。筋骨柔脆。不能挽強。執銳攬荆。吳之士。劍客大俠。獨當一隊。爲國家出死命。使功勞可以紀錄。乃徒以區區研磨刻削之材。而欲周濟世閒。又遭不幸。原田無歲。禍與命期。抱毀負謗。罪大罰小。不勝其賀矣。竊窺古人墨翟。拘囚乃有薄喪。孫子。夫足爰著兵法。馬遷腐戮。史記百篇。

賈○生○流○放○文○辭○卓○落○不○自○揆○測○願○麗○其○後○以○合○孔○氏○不○以○人○廢○言○之○志○亦○將○爨○枯○
舊○聞○總○疏○百○氏○敘○述○十○經○翱○翔○蘊○奧○以○成○一○家○之○言○傳○之○好○事○託○之○高○山○沒○身○而○
後○有○甘○鮑○魚○之○腥○而○忘○其○臭○者○傳○誦○其○言○探○察○其○心○必○將○爲○之○撫○缶○命○酒○擊○節○而○
歌○鳴○鳴○也○嗟○哉○吾○卿○男○子○闔○棺○事○始○定○視○吾○舌○存○否○也○僕○素○佚○俠○不○能○及○德○欲○振○
謀○策○操○低○昂○功○且○廢○矣○若○不○託○筆○札○以○自○見○將○何○成○哉○譬○若○蜉○蝣○衣○裳○楚○楚○身○雖○
不○久○爲○人○所○憐○僕○一○日○得○完○首○領○就○柏○下○見○先○君○子○使○後○世○亦○知○有○唐○生○者○歲○月○
不○久○人○命○飛○霜○何○能○自○戮○塵○中○屈○身○低○眉○以○竊○衣○食○使○朋○友○謂○僕○何○使○後○世○謂○唐○
生○何○素○自○輕○富○貴○猶○飛○毛○今○而○若○此○是○不○信○於○朋○友○也○寒○暑○代○遷○裘○葛○可○繼○飽○則○
夷○猶○飢○乃○乞○食○豈○不○偉○哉○黃○鵠○舉○矣○驂○騶○奮○矣○吾○卿○豈○憂○戀○棧○豆○嚇○腐○鼠○耶○此○外○
無○他○談○但○吾○弟○弱○不○任○門○戶○傍○無○伯○叔○衣○食○空○絕○必○爲○流○莠○僕○素○論○交○者○皆○負○節○
義○幸○捐○狗○馬○餘○食○使○不○絕○唐○氏○之○祀○則○區○區○之○懷○安○矣○樂○矣○尙○復○何○哉○惟○吾○卿○察○
之○

上吳天官書

唐寅

寅再拜。昔王良適齊。投策而歎。歐冶去越。折劍言詞。藝不云售。慨猶若此。況深悲極憤者乎。寅夙遭哀閔。室無強親。計鹽米圖婚嫁。察雞豚持門戶。明星告日。而百指伺餉。飛鼠啟夕。而奔馳未遑。秋風飄爾。而舉翮觸隅。周道如砥。而垂頭伏櫪。隸交叱刀錐。並侵烟爨。就微顛仆。相繼徬徨。闔閣之下。婆婆里巷之側。飛塵揚波。行人如蟻。恫恫惴惴。不可與處。此乃有生之憂。非寅之所畏也。至若槿樹辭榮。芳林引暮。學書不成。爲箕未貨。豔色廢於羣醜。齊音咻於衆楚。雞既鳴矣。而飄搖遠游。日云夕矣。而契闊寤歎。九衢延絲。而窮轍漣如。高門將及。而敗刺無從。又漢綱橫施。略瑕錄腐。驚馬効其馳。驅鉛刀礪其銛。鏑有立功名之士。扼腕攘袂之秋也。若肆目五山。總轡遼野。橫披六合。縱馳八極。無事悼情。愴慨然諾。壯氣雲蒸。烈志風合。戮長蜺。令赤海斷。修蛇使丹岳功成。事遂身斃。名立斯亦人生之一快。而寅之素期也。乃至凍蠅垂翅。絕望驥後。斥鷃棲蒿。仰思鴻末。念言自致力薄。羽微人。

生若朝露百年猶飛電。一旦先犬馬何從効分寸哉。使童牛躑躅於重基。狐狸跳梁於元窳。皮毛並沒草木同塵。雍門援琴吁其傷矣。墨子悲絲絲殊乎。昨矣華省陳筵不可作矣。蟲悲風暄時代及矣。此寅所以撫案而思仰天而歎不能不爲之憤悒而哀傷也。執事俊榜魁元。清時宰相羔羊有不渝之節。鳴鶴得靡忤之道。木鐸警衆象魏詔民。裁成風雨。旋轉日月。朝廷之師臣海內之人望。所謂域中銀斗高標。海內瑤山共仰矣。寅瞻桑梓得俱井邑。感於斯之義。冒通家之請。謹錄所著投贄嗟乎。平子縛才乃假聲於三都之賦。孟陽後進敢託途於劍閣之銘。所以得旁展豐談。直施利筆。苟其不爾。則前愆并聚。後悔何尋。寅竊不料。反顧微軀。塊然一物。若得充後陳之清問。被壁上之餘光。則枯骨不朽。故敢伏光範門下請教。不勝惶恐之至。

答李給事同野書

劉繪

覆漿雖甘。誰注玉缶。擲果雖豔。誰登華俎。去婦有壺才而難與。天姬爭飾老驥識。

道路而難與新駒共軌。弟如理筆者，錦薦玉柱，音調清越，而遇操刀者，一割兄雖愛音，恐鸞膠神膏無能盡續矣。弟以此裂彈冠之賜，決吐馭之想，種豆養魚，別究生業。卽今天中之南，潢水之側，桑煙松雪，四時稱快，蓋以志雖未伸，而道未有屈也。名雖不華而行，未有淖也。位雖未躋，而情無所躓也。弟狂語還謝，恃在心知，當有殊聽。

寄屠漸山書

陳東

屏棄以來，久不欲通問貴游。每懷足下疇曩之誼，擬作一書，輒以猶豫數日。何者？形迹旣舛，情素殊別，恐冒周易浚恆之戒。將蒙谷風棄予之慚，是以搦管操觚，隨又捐棄。亦冀遙忖愚心，知其非媿也。錢黃門入楚，伏承惠書惓惓，詞文藻績，情致顯篤。陳昔時燕樂之蹤，歎數子飄零之迹。奉讀周旋，祇增惋憾耳。方今龍軒側席，鶴禁繼明，寓內訢訢，衿帶之士，揚馨仰沫，足下秉高世之志，體絕人之才，抗迹紫宮，策奇青漢，英聲茂實，爲士品規。夫順風而彈雲和之絲，乘埤而建辰旒之節，不

待。明。知。而。見。聞。廣。矣。幸。甚。幸。甚。僕。不。佞。才。質。紕。繆。無。所。比。數。以。因。緣。階。第。得。侍。內。廷。終。非。其。人。果。遭。罷。斥。邇。來。湖。上。已。三。見。朱。明。矣。五。十。爲。壽。僕。行。年。已。過。大。半。數。時。以。來。疾。疢。所。苦。神。明。不。舍。形。氣。支。離。以。手。約。圍。要。腹。率。計。一。月。小。一。二。分。矣。人。命。難。保。富。貴。何。期。親。故。不。量。往。往。以。詭。詞。相。慰。蓋。孝。標。懷。舊。則。絕。交。之。論。廣。張。敏。恤。窮。而。頭。責。之。文。作。此。皆。不。達。義。命。遠。於。情。實。者。也。夫。十。圍。之。材。文。以。爲。梁。棟。其。斷。在。於。溝。中。同。畝。之。稷。上。而。饗。神。而。其。餘。委。於。雁。鶩。非。其。材。質。不。同。所。遇。之。時。命。異。也。故。曰。安。時。安。命。超。圓。之。傑。知。彰。知。微。保。命。之。幾。足。下。乃。取。徵。於。合。劍。論。奇。於。效。璞。來。書。之。云。信。不。由。衷。乎。僕。早。歲。束。髮。頗。有。弘。志。中。年。蹭。蹬。竟。戾。微。情。君。子。見。幾。不。如。舍。去。不。然。則。匹。夫。效。志。炳。耀。丹。青。况。僕。爲。專。命。之。使。猶。得。參。下。大。夫。之。列。如。使。吾。道。遂。廢。斯。文。在。茲。足。下。視。僕。豈。後。於。常。人。哉。家。世。貧。素。不。事。作。業。糠。豆。之。奉。雖。不。常。飽。母。性。高。明。生。能。容。介。子。之。隱。妻。賢。女。也。死。不。沒。黔。婁。之。行。已。矣。哉。金。門。何。期。石。室。能。侍。高。軒。無。分。名。山。可。藏。句。章。之。曲。儻。容。適。志。乎。謹。題。尺。疏。使。人。北。

干明主。因告足下。拜述前忱。負疾未平。力論不悉。

與李子儀書

錢薇

令郎文敷。游吾門牆。固願曲成之。見其善。則喜。有不善。則憂。蓋師弟之間。一體相關。日望其進於遠大。爲吾教之效也。何乃不脫風塵之見於義利。尙弗之辨耶。昨同朱某來索書。且邀我別室。許以銀田。是誘我也。吾教文敷何如。而乃出此議乎。遂謝絕之。然文敷以利誘人。必自動於利。可知今日已動於利。儻他日出仕。無求不諧。何弗至哉。此所以爲憂。而告於執事。朝夕宜戒訓之。此一著不可放過。於此一差。遂無安身立命之地。縱得顯榮。亦虛器耳。世道弗古。由學術不明。而不明之罪。在師。我有師責。而不受教。反以及門之故。進而爲誘。是可怪也。是可恥也。幸執事嚴加庭訓。毋貽後虞。不得已。敢以直告。幸諒。

謝陳雙山書

錢薇

往在德州。曾覲德範。知門下氣誼。超然風塵之表。自歸耕東海。不獲繼見。殊爲闕

然。昨弟某喪還。亟詢其過梅嶺若何爲藉。乃知纖毫皆門下之力也。昔歐陽詹殞於宦。實賴同年韓子昌黎還其喪。柳子卒。柳州觀察裴君行立歸之河東。門下於同年則昌黎於同宦則行立。義聲宣朗。德問鏗訇。舍弟九原寧無銜結。某非草木能不感德。思報耶。噫。今之當塗青紫。知有貴游。孰悲旅櫬。知有生交。孰念煢孤。門下超然遠覽。行古之心。施恩於不報。垂意於冥漠。非盛德能有是哉。況藉門下眷睽。德慶所差。十夫亦遂竭力扶攜。事事益虔。門下倡之以義。人心率從。被惠弘矣。儻得獎十人於民風。土俗不爲無補。因其旋也。輒此奉謝。然大惠中心藏之。辭曷能罄。幸惟節宣炎勞。懋膺福祉。以登大拜。

與岳厚夫書

陸 粲

自己丑臨清之別。闊焉不聞問者。殆將十年。歸田以來。益與世睽隔。海內故人如吾兄。不獲一握手。憾憾如何。遙聞守官。曲沃猶慷慨。疏論邊事。丈夫經世之志。不以崇庠改易。正復爾耳。僕鄙人也。自惟迂疏之資。不適世用。甘守一壑。無復它望。

近者不幸爲匪人所薦。深用媿憤。追惟往日與兄冒死進言。幸而聖心頓悟。國論稍回。此正世道開泰之會。而斯人者。忍倡邪說。以壞之。使儉邪更進。重爲善類之禍。其罪上通於天矣。雖其後來。或一二能立異同。然不過怙寵爭進之私。寧有忠信廉潔之實乎。藉令有萬一。亦所謂舍簞食豆羹之義耳。何足道哉。世之君子。以其小者信其大者。更稱爲賢。僕嘗惡聞若說。乃今復欲以腥臊之餘。污辱貞士。如僕。死卽死耳。肯以是區區者。易吾初心邪。每中夜耿耿。思一吐露於同志。頃嘗以告華兄。不知能達諸左右否也。因便聊布所懷。

謝卻嫻友祝年書

羅洪先

今世風俗。凡男婦稍有資。逢四五十謂之滿十。則多援顯貴禮際以侈大之。爲之交游親友者。亦皆曰某將滿十。不可無儀也。則又醵金以爲之壽。至乞言於名家。與名家之以言相假者。又必過爲文飾以傳之。而其名益張。凡此皆數十年以來所甚重。數十年前無有是也。夫滿十而不容無言交游親友知之矣。然在人

亦。有。宜。不。宜。者。洪。先。今。年。十。月。十。有。四。日。幸。滿。六。十。回。思。先。人。保。抱。維。持。之。艱。與。夫。顧。惜。教。誨。之。專。誠。不。意。遽。至。於。今。至。於。今。年。且。六。十。不。可。謂。非。壽。矣。而。先。人。所。以。望。之。子。與。子。所。以。自。待。以。終。其。身。者。反。之。絲。毫。無。有。也。故。凡。滿。十。而。悲。傷。益。甚。者。惟。洪。先。爲。最。以。悲。傷。負。罪。之。人。而。納。賓。客。之。禮。際。與。其。言。是。非。忘。哀。以。爲。樂。乎。自。洪。先。有。知。以。來。以。生。日。未。能。奉。一。觴。於。先。人。以。爲。報。也。故。未。嘗。受。妻。子。之。奉。以。自。爲。樂。平。日。不。敢。自。爲。樂。也。一。旦。而。納。賓。客。之。禮。際。與。其。言。以。爲。樂。非。君。子。所。取。也。非。君。子。所。取。者。君。子。所。不。行。惟。執。事。亮。之。且。古。者。六。七。十。之。養。於。學。校。者。尊。其。行。也。故。養。之。以。乞。言。又。其。老。也。則。憲。老。而。不。敢。乞。言。懼。其。勞。也。是。安。其。老。者。將。以。乞。言。未。嘗。以。言。侈。大。之。也。不。敢。少。增。其。勞。未。嘗。以。飲。食。煩。之。也。不。肖。空。生。無。足。比。數。固。矣。槩。以。古。昔。其。不。敢。又。若。此。是。以。先。期。力。疾。以。辭。不。然。將。掃。跡。一。樓。是。絕。其。承。教。於。君。子。也。惟。執。事。憐。之。

答胡柏泉書

薛應旂

某昔旅進南宮。望見光儀。心懷結納。未幾遂服役風塵。沈淪江漢。忽忽十年。不獲一親顏論。昨歲見公籌邊疏草。經制機宜。巨細周悉。雖鼂趙復生。韓范再出。文章論議。當不是過真非。請纓繫頸之虛談也。鄙衷慷慨。益切向往。以爲有人如此。天下事無難爲矣。不謂當事者。旣以不能破格用公。而持國是者。乃復顛倒其說。此何理哉。公今潛卷滁陽。益明宿學於公。何負。但權衡人物者。似不當如此耳。邇聞當宁寤寐才賢。恐永叔不當終爲醉翁。而豐樂閑亭不能久羈公之迹也。重辱諸製賜教。感荷不盡。

答葉教諭書

薛應旂

不敏迂疎。疾病纏縛。而事勢所遭。且有不能處者。甘心田野。鼓舞太平。乃吾分也。再三請諸當道。不蒙見允。將行未可留滯。西湖山中。雖風煙景物。朝夕萬狀。而孤客萍蹤。不得如執事者。一共吟眺。誠不忍獨樂也。大抵天壤間事。誠如夢幻泡影。無常無變。奚戚奚歡。百年之後。雖巧拙不同。終同歸於盡耳。所可恃者。惟此心真。

不。愧。於。本。初。使。胸。中。灑。然。無。所。罣。礙。庶。或。可。爲。他。日。受。用。之。地。也。便。中。附。此。希。亮。之。

與張雙鶴論王戴兩家解仇書

莫如忠

吾松禮教醇俗。二百年來爲東南首稱。至如白谷王先生雲溪戴先生者。雅以行誼稱於鄉。偶因細事。釁起毗隸。忤此兩賢。且不當深辨。其是否以滋好事者之議也。顧吾黨薦紳。義關一體。比諸鄉鄰。有鬪似不同情。故昨於尊召。不敢爲閉戶計。遂扶策以從。及既至。不知諸公已有定論。輒進迂說。無當事情。然僕與二公交等耳。豈敢妄有嚮背。以徼居間之權。顧以理而言。吾輩所當爲。惟此而賢如二公。責以行古之道。謂其必能。故不忍杜口。辭舌。愬然視之。以成其僭爾。夫今兩家之爭。不已。必假決平於有司。如稍有軒輊。又不相下。是兩家之仇。終不可解。而以吾士大夫之體。猥聽於吏議。此非所以訓也。故鄙意欲強二公所難。首屈雲溪。步履率子弟之賢者。爲古肉袒負荊之事。令曉然於途人。而薄責子弟於白谷。所用償疇。

昔衣冠之辱。然後再拜謝過。而白谷亦造雲溪。謝失言之咎。而後兩家之客各屬。觴起爲壽。則其氣自平。而於二公皆盛德事也。藉令聞之。有司必歎服不遑。安所污其文墨。至所爭尺寸。於得失尤微。讓之可也。割之可也。如聞田棄之可也。豈必較勝負於影。繖鼓脣吻於胥靡。而遺其大者哉。昔漢魏其灌夫皆大吏也。郗起請田。以至禍延家世。誠不忍其恚。而廉藺相屈。呂范解仇。古今交賢之二者。是非執事所悉也。儻遂以余言轉聞兩家。於風俗之關不細。如何如何。

與吳宗高書

汪道昆

不佞爲方外遊。所至不求自通於長者。毗陵信宿。乃復東行。會舍弟道化自山中來。將欲受業公子所。吾兄以經術霸海內。而羣公子則又翩翩稱奇。即韋氏明經。當避三舍矣。舍弟時過。而後學誠自知師勞。而罔有功。儻以金篋道之。則衆生皆佛性也。謹爲紹介。待命閭人。惟高明照察。

與徐用先書

楊慎

伏在草莽。不知外事。聞諸道路。不識信否。執事與以道並嬰嚴狎。俱編行戍。驚與歎會。豈忍喙哉。殷憂之不隕。大難之無虞。則實有相之。猶竊自念曰。兩公庶其來。溘乎。則同患者。猶有覲也。互問而無徵。厚望而不來。乃今知之。越在遼碣。是區區微願。而不余畀也。命之屯蹇。信也。之子之懷。其余同者。嗚呼。途之畏者。莫如宦任之重者。莫如身事之難者。莫如患處之善者。莫如道。子乎。子乎。以畏者去。則輕以重者。幸則全。以難者行。則素以善者求。則得。復奚喟焉。復奚媿焉。走昔承下風於子矣。今復爲子誦之。且人而旣遺之矣。天者可定而必乎。他日攜手里社。接景桑梓。餘生猶有良冀也。急使遽書。意滿辭塞。時有南風。更望嗣音。

與歐陽子重都憲書

楊慎

不肖不天。禍延我先考。萬里聞訃。五內摧裂。曾不得啣。噍躑躅於側。曾不比於鳥獸焉。奈何奈何。當復奈何。屬在冑胤。宜宅喪主。於此不歸。是無父也。歸而不告。是無君也。無父無君之人。執事奚辱役焉。執事若矜其情而賜之告。使襄事寧。凶過

歸反役。惟情與憲實兩兼之。草土之言。非所以瀆公聽聞。私門之故。未可以戚我執事。亦自知之。然執事仁人也。錫類者也。哀有喪者也。必欲歸處不肖者也。故敢以私於左右。臨狀荒眩。不知所宣。

謝歐陽子重書

楊 慎

不肖遭先君子之喪。歸情也。稽於禮則古缺。比於律則今無。星奔之懷。翰如奮飛。俟命中路。皇皇罔措。僕人回伏。承手教。知爲不肖公言以疏矣。又獲見牘草。洽君臣篤父子。酌情憲。制義命。亡於禮者之禮也。其動也中。執事處我勝我自處。非夫重人極。扶世教者。其肯爲此。又非夫正學之淵粹。文宗之世胄。其能爲此。不肖不佞。豈以臺下撫己多。而私頌作德哉。弔客盈坐。莫不動容擊節。以膺盛德而佩高義。況在不肖之身者。不肖天地罪人也。茲獲申其情事。少道其不孝。死且不朽。若猶幸存視息。不隕其世。生之一日。公之德之賜之及也。豈惟愼也。受賜先君子重泉實昭感之。不肖不忘先君子。其敢忘執事哉。匪不敢忘。將不能忘。匪不能忘。焉

忍忘之。臨書涕泗交頤。哀感切骨。不知所云。

與金鶴卿書

楊慎

自七月之變。分手非所。不面之闊。藐焉五年。斷金睽於參商。渴瓊發於寢寐。如何。其可聊也。惟別之後。兩枉珍翰。一投嘉藻。啟緘伸紙。喜與忭會。既睹手跡。兼照心素。滯荆之跡。雖同。仲宣投沙之懷。負異。賈傅欣恫。欣恫幸甚。幸甚。亟欲嗣音。仍闕便驛。遷延至今。傾翹益勤。走孱弱之軀。不耐瘴厲。戊子春月。忽中末疾。篤癰沉痼。行動仰人。窮荒絕域。乏醫鮮藥。閉門抱影。越歲踰時。近兵爛甫定。而札瘥大侵。繼之蓬心。搖兀。難以託根。波臣涸轍。又復轉徙。孤懸浮寓。望鄉益遠。無悰寡侶。較頃彌甚。儋石同粟。里而室。無阿舒之愉。遲暮如子雲而門。無好事之問。僻遠視瓊。儋而館。無白鶴之假。寂寞均柳。永而遊。無黃溪之適。時復靜言。追惟疇曩。承清塵於俊造。厠華景於英流。桑梓芝蘭之契。宴笑過從之雅。微言疑義之析。酒賦琴歌之懽。炳焉服膺。宛猶昨暮。忽爾影響。曠若隔世。存者如晨星之望。逝者有宿草之悲。

老子芻狗之談。釋氏露電之喻。其最得乎獨居多暇。感集悲來。輒藉此言。詮以濯情。素高朗之懷。其有同者。

與林戶部世觀書

王愼中

側聞榮拜南曹。私心不滿。以爲方今士流文學操行。如兄者。獨不得居侍從。列要近。而置之冗曹閒地。耶。繼而思之。其冗也。乃所以益閑其力。而後安之也。其閒也。乃所以益充其量。而後庸之也。而區區以一時一職。不滿於心。予其爲妄與淺乎哉。金陵江山之最美者也。余居之不能期年。而去鍾山淮水。往往在於夢寐也。況得如兄者。一同游於其間。其樂何如。顧今已矣。臨楮輒復興懷。便中一以所樂告我。幸甚幸甚。

與安膠陽書

王愼中

承不遠三千餘里。特使見存。屬以文字之事。其意良厚。而誼亦甚高。自度非鄙陋所當蒙也。久留來使。意從容旬月。勉竭思慮於文。或有可觀者。今乃若此。又悔不。

如。早。落。筆。免。淹。使。者。茲。乃。重。增。一。愧。矣。請。文。厚。儀。謹。以。奉。還。僕。非。爲。廉。也。平。生。門。戶。甚。寬。於。辭。受。之。際。不。能。爲。狷。尋。常。交。際。如。今。人。所。謂。接。以。禮。者。猶。多。受。之。況。於。請。文。之。禮。固。未。嘗。辭。也。而。乃。介。於。膠。陽。數。千。里。惓。惓。命。使。之。所。委。者。乎。凡。僕。所。謂。受。其。請。文。之。禮。者。皆。爲。其。父。祖。大。事。或。自。名。其。堂。室。而。乞。記。之。類。僕。爲。之。文。則。爲。有。寵。於。其。人。之。先。與。其。身。故。不。可。不。受。之。以。副。其。誠。而。不。宜。爲。拒。也。若。膠。陽。所。請。序。乃。有。宋。曾。南。豐。與。今。唐。荆。川。兩。先。生。之。文。此。吾。黨。之。同。願。斯。文。之。義。舉。僕。於。此。道。非。但。有。勉。又。最。留。意。苟。得。聞。之。欣。然。滿。意。將。爲。同。好。致。謝。於。膠。陽。今。乃。以。作。序。之。故。受。禮。非。獨。無。復。廉。隅。且。是。都。不。有。意。氣。也。幸。鑒。此。心。請。勿。訝。其。爲。拒。又。請。勿。譽。其。不。取。

與吳泉濱書

王愼中

僕爲此文以授佩甫君。使刻石納壙中。佩甫讀之未畢。涕數行下。哽咽不能出聲。幾於自絕。爲廢其讀。讀之三四而後能畢。每讀皆飲泣欲絕。以謂道其情事如探。

其肺腸腎膽而所以寫其親者不獨神志如存形貌亦宛然在目矣夫孝子不忘其親者思其居處思其笑語思其所樂所嗜思之之極其精誠之專而猶不得見而一讀吾文則其人忽然在前而居處笑語樂嗜皆是蓋文之妙如此昔少君致李夫人於帷帳燈燭之間使武帝真以李夫人爲生也文亦有是與然非佩甫君之孝亦安能於吾文中輒見其親之悲之至於如此極也公既深愛佩甫而尤好吾文故聊往覽而併道佩甫之所感於斯文者使知吾文未足好而佩甫之孝爲可重也

復沈萬川會昌大尹書

海 瑞

虔中交與二年興會道里不遠政事如公未聞有疵議也今日之說何自而來哉何自而來哉近與五台朝夕乃知公受讒有自相與歎公之厄於所遇如此如此夫君子盡其在我而已事久論定從古而然縱使不定亦豈君子之所宜預心哉禦寒莫如重裘止謗莫如自修吾儒學問其功夫止責己不責人誠如孟子三反

顏子不校。卽媒孽之所自用之。檢吾所未周。卽縣空之所指用之。防吾所或蹈。是今歲因寒之裘。將之爲歲。歲禦寒之備也。因謗而益其益。不旣多乎。若曰難乎。免於今之世矣。而改行以求通得之少。而喪則多。不敢爲公願之矣。詩云。不失其馳。舍矢如破。承厚意。敬付私念。以謝惟諒之。

復周一陽主事書

海瑞

來札以不敢一毫肥己。自誓執事之疑誤矣。賣者以執事爲名人。可樂就。買者以執事爲說人。必無辭。此亦人情。常事。生非以見利疑執事也。二子之所親者。生與執事。此與執事圖之耳。往者不可諫。來者猶可追。此執事分也。執事責也。若謂恐外。人有意度之。謗一切不與。且不能止之。不賣則不惟忍。生者之無依。且辜死者之負託。我雖不殺伯仁。伯仁由我而死。執事終得以辭其咎耶。二老有靈。今拳拳於抔土之下矣。執事念之。

與徐子言書

歸有光

向僻處山縣。不與世通。遂不覺違離數載。懷仰何可言。常怪吾吳中宰縣者。坐貴之甚。幾與民庶隔絕。頗不然之。故爲縣一切弛解。雖兒婦人。悉至榻前。與語。每日庭中。嘗千人。必盡決遣。而後已。不爲門戶闌入之禁。至所排擊。皆大奸待士大夫。必以禮而未嘗不以情處。獨流俗所以爲訾者。不馭吏也。實亦無負於百里之民。不幸有所忤。犯致凶德。參會極其排陷。幸當世士大夫猶有憐之者。僅不竄謫。然於儕輩已不比數矣。昨歲因遣人領先人勅命。卽具疏乞解職。南岷王公故相知。抑不上。復貽書勸勉。然趨趨乃至。五月到邢。意已悔恨此行矣。銅梁張公近按察天雄。云遇執事江陵。備道見憐之語。且云當時亦未意來此。張公以是頗相禮遇。隔越數千里。無尺素之文。而兩公獨相與語於江漢之間。卽警歎無不聞。極令人感歎。特遣人託子完寄謝。會晤未卜。不勝瞻跂。

與沈敬甫書

歸有光

山城僻處。非當孔道。雖隔一湖。視燕京更遠耳。爲五斗米折腰。意默默不能自得。

也。生子癡了官事。官事未易了。奈何。丙丞相不案吏。僕性實不喜案吏。人謂不能稍案吏。人翕然稱之。僕獨笑謂吾非案吏者。聊以戲君。然竟不案吏也。每視事。吏環立。婦人孺子繞案。傍日常有數百人。須臾決遣。自以爲快。或勸自尊嚴如神人。又不能也。與太學生飲。人或譏之。然無太學生肯相召飲者。恨不得與老兵飲耳。人須當任性。何可強自抑遏。以求人道好。昨從顧渚山望太湖。風帆半日。可到家矣。以公相知及之。

致汪伯玉書

王世貞

聞事棘。國家急得公。如天球大貝。一旦借公力。略定閩。不經事少年。從而擬其後。賴廟計差定耳。公所謂獨爪猶鏡磨之益瑩。且此舉僅六月。息扶搖。羊角九萬益上。第臺諫類若此。異日縣官緩急。何賴僕擬。汎一棹從公。爲綠野之客。傾吐揮霍。使千古色動。因謁齊雲。得遊黃山。而歸大愉。快念老母。不能遠出行。復自笑造物者。當忌此舉。動吾曹不利人。乃累公耶。昨偶見一友人云。公能轟飲至數斗不亂。

與公同年近十載始得公文又十載始得公酒可爲晚合然至於命樽壘呼盧握槊分籌鬪白又未卜何日也語及更益悟悵耳

致李伯承書

王世貞

比自庚午奉教後棄官南歸再起出入燕楚時時念兄無異粉署而鱗羽爲艱近從李史君處得手教恍若奉顏色且連有三熊之夢不勝慰心白香山官位差小進耳聞濮上園亭若履道者四蠻素綃角又更倍之渠僅有阿龜不堪遼落兄篇章朗著又非彼所及也所冀禪心不墮魔女手中時時容綵筆翫世耳新刻甚精第憶兄白鹿舊聯世遠六經藏入壁丹成五老化爲峰是前人所未道語今却改上句覺景雖勝而聲事不稱仍舊貫如之何吾家弇山園真足稱三山六水宏麗幽絕事事可意爲吳中少年共之郟城僅如斗大安能久匏繫耶所輸兄者此一著耳承諭後進何如人天下大矣句踐尉陀崛起江海間不無大國之賦主盟故當自難兄表裏河山故無害也李史居然有慷慨擊唾壺意亦是一怪事可笑可

笑。

與王宮諭書

王世貞

知已奉太夫人由相衛入關。還故里。觴桑落爲壽。甚樂。使人云。出當別取道漢中。汎巫峽樓舫而下。直抵留都。視曩稍迂也。司馬子長多壯游。游竟奇其文章。執事亦有意耶。明興高文。二帝鼎卜。二都雙垂。若日月開闢。元穢百七八十年來。彬彬之治。亡論邁漢唐矣。卽吳蜀偏季。尙有太沖孟陽諸君子賦之。茲何寥寥也。吾州故桑君名悅者。庸妄人好自標著耳。爲二都賦類。不過閭闔中貨郎肩裝而鄉里小生時時或稱之。夫使堂堂大明兩都。卽無以賦者。尙可而奈何。使桑君拉而污其重。又令後世窺而淺之也。執事握筆珥簪。廬承明席。天祿坐臥燕邸。垂二十載。中間秘籍藝文與學士大夫所稱說亦已多矣。而今望鍾山撫大江。據雍容之署。得以其燕馳騁。上下當不。大讓孟堅平子也。數百年一時。願公勉之。天子神聖。定國本。鋤芟。慈惠登用賢人。先生不日贊謀議幾事。萬集飯沐不暇。誰行議此舉也。

與黃淳甫書

王世貞

僮回啟匣。則檀香襲人。以一遺仲蔚。一自供。至今鼻端拂拂。有天際真人想。瓊菜色。眞如藍田綠玉。嚙之。令冰液流。齒牙酒腸。自滌眞大快也。恨乏曹子桓筆手形容之。使二妙沈鬱耳。歲暮寒劇。山陰棹興。未出門而盡不及子猷矣。

報劉一丈書

宗臣

數千里外。得長者時賜一書。以慰長想。卽亦甚幸。何至更辱饋遺。則不才益將何以報焉。書中情意甚殷。卽長者之不忘老父。知老父之念長者深也。至以上下相孚。才德稱位。語不才。則不才有深感焉。夫才德不稱。固自知之矣。至於不孚之病。則尤不才爲甚。且今世之所謂孚者。何哉。日夕策馬。候權者之門。門者拒不入。則甘言媚詞。作婦人狀。袖金以私之。卽門者持刺入。而主者又不卽出。見立廡中。僕馬之間。惡氣襲衣。裾卽飢寒。毒熱不可忍。不去也。抵暮。則前受贈金者。出報客曰。相公倦。謝客矣。客請明日來。卽明日又不敢不來。夜披衣坐。聞雞鳴。卽起盥櫛。走

馬抵門。門者怒曰：爲誰？則曰：昨日之客來。則又怒曰：何客之勤也？豈有相公此時出見客乎？客心恥之，強忍而與言曰：亡奈矣！姑容我入門者，又得所贈金，則起而入之。又立向所立廡中，幸主者出南面，召見則驚走。匍匐階下，主者曰：進，則再拜，故遲不起，起則上。所上壽金，主者故不受，則固請，主者故固不受，則又固請，然後命吏內之。則又再拜，又故遲不起，起則五六揖始出，出揖門者曰：官人幸顧我，他日來，幸亡阻我也。門者答揖大喜，奔出。馬上遇所交識，卽揚鞭語曰：適自相公家來，相公厚我，厚我且虛言狀，卽所交識亦心畏相公厚之矣。相公又稍稍語人曰：某也賢，某也賢，聞者亦心計交贊之。此世所謂上下相孚也。長者謂僕能之乎？前所謂權門者，自歲時伏臘一刺之外，卽經年不往也。間道經其門，則亦掩耳閉目，躍馬疾走過之。若有所追逐者，斯則僕之褊衷，以此常不見悅於長吏。僕則愈益不顧也。每大言曰：人生有命，吾惟守分爾矣。長者聞此，得無厭其爲迂乎？鄉園多故，不能不動客子之愁。至於長者之抱才而困，則又令我愴然有感。天之與先

生者甚厚。亡論長者不欲輕棄之。卽天意亦不欲長者之輕棄之也。幸寧心哉。

報王元美書

宗臣

僕聞古者有遠行。則其與游。咸有贈貽。以結永好。足下被繡擁旄。提兵千里。其爲故人光寵甚厚。不可亡贈。夫足下所督戎者。故齊地也。其俗僇悍。猾賊椎埋。作姦羣邪。藪澤譚王道者。病之足下往矣。得以憲章從事。取象於物。惟豸性爲能觸邪。故贈君豸衣一襲。夫羣邪所自邪也。亦自上之約束爲之不束之。而遽收之。是謂不教而殺。非聖謨所貴。君子之束人也。必先自束其身。故贈君腰帶一束。自束束人矣。猶有不若者。則付之三尺。以彰國威。以著足下之明信。故贈君古劍一口。明有豺豹幽有魍魎。無不靡之矣。此數物者。不足以當足下顧於鄙人之心。抱區區焉。敢再拜以獻足下。唯足下圖之。

報李于鱗書

宗臣

使者來讀十二體詩。怒髮指冠。兩君何得。乃爾。是夜命楚姬奉卮。展楮。章章綴之。

星辰。亂落。題曰。獨酌。卒不使。兩生。獨擅。千載也。元美遺僕書。謂僕當決漳河灌襄國。欣然有當於鄙心。太行久爲足下所苦。今西而秦。則二華更復生愁。日者地坼山裂。黃河人立。得非足下消息先傳乎。僕當爲足下賦太行二華兩篇以報之。恐風電起。輿中驚恐。使者使者且留。先馳一騎往報足下。當展覲桑梓。則欲遲足下。西湖之上。能爲我緩轡乎。采綃之辱。吾已命楚姬佩之。願何以報蔡夫人也。

答李長公書

徐渭

劉君來得長公書。并銀五兩。前此亦叨惠矣。何勤篤乃爾耶。令人不可當。顧念老病漸逼。灰槁須臾耳。無可爲報。如輪迴之說。不誣定庶幾了。李源圓澤一段公案。聞勳業日隆。大用在卽。卽披甲躍馬。三發小侯破的。而飲羽買韓盧。五明馬適至。便牽往蓮花峯頂。浮大白不計斗。石侍兒抱琵琶。棖棖響萬谷中。儼然突騎出塞之爲者。此等豪筋俠氣。定勃勃長在掌股間。正今日囊錐時事也。如相憶。伯喈便可呼虎賁坐飲耳。臨書三歎。

與華郎中補菴書

唐順之

僕不能爲義。而竊好人之爲義。古者有無相通以成一體。二記文中頗盡之。嘗見世閒富人。惜財如惜血。苟出其橐中朽腐棄餘。尙足以活宗戚閭里無限。垂絕之命。乃睽睽相視。不少動乎其心。以爲生財之道。宜如此。蓋財生而心死焉。久矣。以此僕於執事義田。及史君荒滄二事。心竊慕之。凡求余文者。多莫之與。而此二文者。雖兩君不以余委。而余固樂爲之役也。況其見求之殷乎。但筆力凡鶩。不能發揚盛事。以風厲世人。是可愧耳。雖然。聞方洲謂吾文勝錢公輔。此或不敢虛讓。執事眼中。自當得之。但裴晉公奉酬皇甫。持正文價故事。不知執事如何爲處耳。生平未嘗敢受潤筆之資。聊書此發吾丈一笑。

與楊椒山書

唐順之

執事豪傑士也。忘身許國。不回不撓。使世閒脂韋。渙忍全軀。保祿之士。聞風縮頸。執事之志。則然而才足濟之。自丹陽奉晤。令人歎羨不已。然覺慷慨激發之氣太

勝而含蓄沈幾之力。或不及焉。夫直前太銳。近於用壯。取必太過。近於浚。恒在易。固有戒矣。惟幾也能通天下之志。惟深也能成天下之務。自古欲成務而或償焉者。未必盡是庸人。或豪傑與有責焉耳。僕少頗負意氣。屏廢以來。槁形灰心之餘。化爲繞指柔焉。以此自量。乃欲以此比量豪傑。知必見笑。然以敬慕執事之至也。不敢不盡其愚。

與安子介書

唐順之

謹具布被一端。奉爲令愛送嫁之需。布被誠至質且陋矣。然以之而廁於刺繡結縵。綾綺綃金。綴翠玄朱。錯陳之間。則如葦簫土鼓。而與朱絃玉磬。金鐘大鏞。相答響。乃更足以成文。又如貴介公子。張筵邀客。珠履貂冠。狐裘豹褰。聯翩雜座。旣美且都。而有一山澤被褐老人。逍遙曳杖。其閒乃更足以妝點風景。而不失其爲質且陋也。且夫桓少君之事兄之。所以養成閨行。而出乎習俗之外者。豈足多讓古人哉。素辱知愛。敢以家之所常用者爲獻。而侑之以辭。不然亦願兄受之。而以畀

之。媵。僕。之。用。可。也。

與卜無錫書

唐順之

僕支離牀席。已成廢人。久不能一奉晤言。殊深耿耿。近敝邑一刻字人云。執事欲刻鄙言。雖或傳言之妄。然聞之殊不自安。蓋執事與善之過。雖淺陋言語。猶不欲遺之。此在執事。則爲盛心。然本非立言之人。而徒爲覆瓿之用。此在鄙人。則甚可愧。且今世所謂文集者。徧滿世間。不爲少矣。彼其初作者。莫不妄意於不朽之圖。而適足以自彰其陋。以取誚於觀者。徒所謂木災而已。僕每爲彼愧之。而復自效尤之乎。昔人論文章家。惟見理明而用功深者。乃能得之。此未易言也。況僕平生本無立言以求不朽之意。偶少年時隨一二友人。強習世間綺語。以才力滯鈍。兼復癩病。加以疏拙於身心。而強欲求工於筆札。竟不能工而罷。閒中偶觀舊稿一二篇。支離不經之言。滿紙而是。盡欲焚燒爲快。又自悔向來錯用心力。而一無所成也。若欲以此傳於人人。則旣以自誤。又復誤人。且昔人云。人短於自見。僕自知。

猶。然。人。又。將。謂。之。何。執。事。苟。以。爲。可。而。欲。傳。之。是。有。累。於。執。事。之。明。苟。不。擇。其。可。否。而。欲。傳。之。是。有。傷。於。執。事。隱。惡。之。義。也。承。執。事。知。愛。敢。布。腹。心。萬。望。中。止。其。事。則。執。事。之。愛。我。更。厚。矣。

復丹徒邑諭唐白野書

茅坤

解。官。南。還。承。公。手。書。嗚。咽。嗟。咨。若。將。弔。不。肖。之。奪。官。而。又。憐。非。其。罪。者。雖。然。公。讀。古。今。傳。記。當。上。下。數。千。年。矣。其。閒。可。悲。可。詫。可。憤。可。涕。之。事。不。知。其。幾。金。焦。之。下。大。江。之。滸。得。無。猶。有。漁。父。鼓。枻。歌。而。過。者。乎。歸。來。山。中。左。手。持。南。華。右。手。持。碁。局。醉。則。援。筆。賦。文。章。稍。稍。淋。漓。宴。嬉。以。恣。其。邱。壑。之。思。或。自。一。道。也。幸。公。姑。置。之。

約同人刻未見書啓

李日華

吾。輩。榮。名。素。澹。雜。嗜。無。關。所。以。漱。滌。神。情。開。益。智。慮。唯。是。松。光。竹。蔭。滑。几。恬。薰。消。受。三。餘。橫。陳。一。冊。而。已。昔。李。文。饒。敘。平。生。快。意。事。以。爲。無。踰。讀。未。見。之。書。裴。晉。公。抄。漢。書。未。終。篇。以。爲。永。恨。彼。所。謂。魁。壘。丈。夫。也。是。皆。濡。吻。富。貴。之。膏。盛。色。旂。常。之。

樹者而猶嗛然欲厭心於是矧余輩遊斯息斯方與蠹爭食者哉顧今天下號慕古者衆書亦稍稍盡出而三吳澤國轉輸良便少縮饗飧之餘無難耳目之及有如品目顯著簡帙重大且競爲國門之懸矣唯夫庾詞隱笈單乘孤詮咀吮多海錯之奇雜陳駭遐方之睹詭同雞吐貴等蛇銜往往襲珍櫝內匿耀帷中有者弗傳傳者弗廣今夫抽珠玩月絕意荆山擊筑飛霜忘情法部專愚沈痼莫之與瘳亦可悲夫誠令彙萃璣璘編貫條理各登所善遞相灌輸存古人之大全垂宇宙之絕業欲飲則人人適河索照而家家取燧寵嘉無限表樹龐宏不亦爛然羣玉而洋洋雅奏也哉余願博雅君子圖之

答俞連山書

張元忭

使者來示以天寬子傳把玩數過令人胸次豁然神思飛越如目接羲黃與之賡和也傳中寓言多類南華老人之談而寫出胸中抱負處自與迥別曩時未能深探衷曲徒見公之面聆公之言則謂公蓋將遊方之外爲白日飛昇之術而未誠

者也。夫道不同不相爲謀。既業彼術矣。則必捐室家。棄舉業。毋鄉井。是戀。乃爲超。然無係累也。而公皆不能。則其爲道也未誠。夫誠者成也。不誠則何成哉。且使公此心卽誠矣。亦非某所望天下而皆若人。則天下何賴焉。天生豪傑。豈使之自有餘而已哉。乃今誦來傳。至好讀說命及高歌出師表。愛誦岳陽樓記。始躍然起曰。有是哉。此老之自負。果奇崛也。充斯志也。是真傳說孔明之儔。而希文之匹也。向吾所聞其有託而逃焉者耶。昔楚君問治國之術於詹何。而何對以養身之術。曰。未有身治而國亂者。故大丈夫處世。其遇也推所養。以及之天下。其不遇也。超天下而獨抱其真。其處也爲傅巖之築。爲南陽之臥。其出也爲國家舟楫。爲四方霖雨。扶弱統鋤。強雄託孤。受命無所不可。先憂後樂之懷。爭光日月。不與草木同朽。腐斯誠奇男子。分內事耳。夫其具在我。遇不遇在天。故嘗揭之座右曰。趨勢以邀富貴。誣天數爲人謀也。假勢以市恩威。貪天功爲己力也。曾不值達人之一矐耳。此輩猶蝸爭蠅集。何足置之牙齒間。然彼修玄之士。墮支體黜聰明。悖常亂紀。無

碑。世。教。亦。奚。取。焉。乃。今。窺。公。之。蘊。所。持。甚。正。所。自。待。甚。重。知。我。者。希。正。老。氏。所。貴。豈。須。與。流。俗。較。毀。譽。哉。某。鄙。人。也。而。所。以。自。期。頗。不。能。爲。齷。齷。者。玩。斯。傳。重。有。契。焉。欲。作。一。跋。苦。不。能。文。聊。布。此。復。來。教。且。以。幸。傳。范。諸。葛。之。復。生。也。某。將。步。下。風。而。爲。之。後。先。焉。如。何。如。何。

答王對南相公書

申時行

日者綸詔傳頒。使軺行邁。還溫公於洛下。起謝傳於山中。當寧虛懷。舉朝廷頸而行。以曾陪末議。誤辱深知。忻逢一德之交。彌切同心之幸。側身而望。屈指以須。區區鄙衷。略具前啟。乃脂車未駕。而控疏再陳。遜膚瞻兒。兒之容。僂僂見謙。謙之德。然而聖情特注。溫諭加隆。念是主恩。安得以必辭。爲潔揆諸臣節。豈專以不仕爲高。且行至陋。愚分當引退。猶以犬馬之戀。尙從蠶鷲之班。而況門下忠結。主知道孚。人望鋒車。特召不殊。審象之求。袞烏重來。庶答迎郊之禮。此則縉紳所共。僭觀而在。私衷尤切。仰祈者也。春日正和。程途非遠。萬惟涓辰。趣駕計日趨朝。以副輿

情以光揆席。有懷如縷。統候面陳。

答鄒南臬吏部書

申時行

始興人還。再奉答教。銜戢何似。乃諭誨諄諄。直諒僕之心事。而略其愆尤。則又不勝知己之感。僕樸拙謏陋人也。驟躡穹階。謬膺重任。而當前人烜赫嚴苛之後。主上親政攬權之初。僕之愚見。第欲謹守舊章。敦崇大體。以推賢達善。布德緩刑。爲兢兢僚案之間。務在協和。不敢專決。至於冕旒之上。靡所挽回。宮府之間。不無牽掣。念之不勝惶悚。然九年之中。僕所操持而設施者。可指數也。而言者相與訶斥。曰。權奸曰貪肆。則僕反己捫心。有死不服者矣。蓋僕才疎術淺。識闇望輕。而人責之太苛。求之愈備。如謂不當侵權干撓銓部是矣。而遷除升擢。一不厭人意。則交口而見訾。謂不當營私。牢籠言路是矣。而詆譏論刺。不協公評。則又躡影而見疑。甚者以贊定壽宮爲誤國。以力請建儲爲希寵。又以爲觀望持兩端。人言狎至。而僕遂不敢一朝居矣。僕雖不肖。然頗知賢奸邪正兩途。判若白黑。何至顛倒眩瞀。

一念縑衣之好。不敢後於人。若經闡引拔之士。尤稱知厚。如趙定宇沈繼山。以高節盛名爲僕。增光百倍。僕未嘗不殷勤推轂。定宇先辛。未一榜爲亞卿。繼山以主事召歸。不三年而爲京兆尹。頗謂不薄。而讒人從中簸弄。遂失兩君之心。相與詆僕。僕甚詫之。而不敢急於自明。徒取文過飾非之咎。直俟之論定耳。向來顧涇陽相過。每鑒僕苦心。過有褒許。乃今又得公一言。洞悉僕之隱衷。而寬其顯責。人之相知。貴相知心。豈虛語哉。僕老矣。近患左臂不仁。伏枕經時。今尙未瘥。恐終爲廢人。不敢復論人間事矣。惟是生平自好。晚而得見亮。於大賢不終汶汶。則雖沒齒蓋棺。又何憾焉。茲因始興赴任之便。再陳謝私。并布鄙臆。然自顧亦嗶嗶矣。惟公亮之。

與陳兵使書

馮時可

冬。邸承翰。貺遠遺。倥傯中。未遑報謝。爲歉。邇者。漁陽宴然。纖塵不起。春風細柳。清嘯滿樓。知甚娛快也。不佞欲俟秋間。求作一使星。走尊幕。與公豪飲十日。呼涼風。

佐之。其見許否。舍親宋太學。俶儻瓌怪。喜談韜鈴。每策時務。屢中曾西遊上谷。少露其奇。大帥雷公口不置。意欲接引。顧念薊天下重鎮。公天下偉人。走諸邊。勿走薊。卽走薊。勿謁公。何以雄所見。此其志。可想。今短衣飛鞚。慙慙北矣。乞僕書介焉。此生雖日中無百萬。貔虎氣復能知雄守。雌不失儒生。態僕灼其非妄也。不敢辭。然袖中復有他貴人書。無乃贅與。此抵油幕毫末耳。何足重。第公居闔外。求士若渴。或姑取焉爾。夫當塞上宴然之時。令一士在旁談說。益引公清嘯乎。

與李師書

馮時可

公在遼陽。數年使土蠻。諸醜進若搏景。退若據虛。眞所謂神於爲兵。威不足以命之也。天子雖未加徹侯之賞而已。深嘉其能矣。不佞邇來益覺寥穆。居署中常邑。邑如三日新婦。不若與河朔健兒。挽繁弱。縵胡纓。馳騁於平原廣澤間。令人溲然。豐滿而手足拇動者。屢矣。貴鎮或乏治兵使者。大司馬有意不佞。儻得共列行間。因以盡窺玉韜之祕。而稍竊其緒餘。以博凌煙一行字。俟公功成之後。去訪黃石。

則又杖屨而追公於穀城山下。此夙願也。

與戴謙甫書

馮時可

昔人以安身爲樂。無憂爲福。又況有書萬卷乎。吾以六籍爲皇都。以諸史爲九州。以老莊釋氏諸經論爲化域淨土。以詩詞雜說爲狹邪委巷神車。意馬游涉其間。斯吾得志之秋。亦何困苦之切。但恨足下不我共耳。章兒意欲析箸。便割五百畝遺之所存者。止坂田一二頃。崎嶇墮塙。平時十不收一。今又遭旱。必無能餬口矣。其何以潤足下。足下有舌若張儀。有算若計然。當不憂餓竊。恐將來不佞。更當以足下爲子錢家主人也。

上王座主老師書

馮時可

孟夏走一介候起居。因獲報書。恍然如履木天。藜火之地。而聽鳴金珮玉聲也。無任欣慰。奉啟後。卽往黔西。展轉三千里。蜀道滇程。亦兼涉。歷旋省未幾。復以夷變。往撫釋衿裙。而事袴褶焉。夷言夷面。日暮相對。書生之致。於此都盡。且所履非峻。

坂。卽深溪。乍而攀霞。乍而墮井。異雲如幕。黃霧如塵。電若烽火。雹若矢石。我馬虺
隤。役夫辟易。九折畏道不足言也。盤江白水之間。瘴氣更甚。蜿蜒雨後。絕類虹蜺。
千里無人。鳥墮獸伏。自念奉先人遺體。奈何輕試於此。九月回署。因疾乞歸。遂攜
賤類待命境上。俟中丞疏發。卽通行耳。具區之陰。爰有菟裘。亦足雌伏。但未。能樹
勳猷。以報我師。中夜思之不無耿耿。我師聲實並懋。鼎鉉在望。某當從田間舉首
以俟。燕雪作寒。惟爲道爲天下自珍。

上六兄杜陵書

馮時可

別後五日而至武林。則仲春望前一日也。假昭慶寺爲寓。日已亭午矣。旣享桑門
之饌。遂往謁武穆王墳。游騎如蟻。畫舫如鳧。山翠水煙。皆爲掩蔽。已度六橋。入淨
慈寺。從六橋策馬歸。桃花盛開。與日光霞氣相射。爛然奪目。十五日曉。度合澗橋。
歷飛來峯。上韜光庵。湖光江色。倒影諸峯。如一羣綠髮姬。爭寵雙鏡。下至冷泉亭。
濯足。入上天竺爲頓飯焉。飯後游傅氏園。至玉泉寺觀魚。遂從西泠橋入陸祠。山

斷橋歸舍。十六日登瑞石山。於紫陽洞觀丁野鶴遺蛻一壑。玲瓏霞分雲碎。自足娛人。已出湧金門。至柳洲亭。汎湖徜徉竟日。十七日復以小艇沿內外湖。已入大佛寺聽經。與客飲張太宰園。抵暮始歸。十八日往大慈山觀虎跑泉。相傳性空大師棲禪其中。神人使二虎移南岳童子泉來是也。泉霽沸而出。若珠琲然。飲之甚甘冽。已沿江過六和塔。登五雲山。上下七十二盤。諸山迤邐起伏。其下如千百虬龍爭動。鱗甲日戾。至上天竺。時禮大士者。人以億萬計。攘攘竟夕。十九日由集慶寺後登風篁嶺。蟠幽踞阻。迴出塵表。嶺下有石名一片雲者。高可丈許。青潤玲瓏。巧若鏤刻。已入寺觀龍井。崖下一泓。縹碧異常。佛廬前有神運石。黿頭石。皆甚奇。又有辟塵鱸。非木非石。扣之錚然。已往煙霞洞。洞狹而深。如廊房。然旁有象鼻石。其上佛手巖。其下水樂洞。皆足供耳目。已入石屋寺。觀石屋洞。洞狀如軒榭。孫中貴所重飭者。已入高麗寺。寺稱鉅麗。轉入法相寺。松竹蔚然。有長耳古佛肉身。二十日與客汎湖。飲三橋水閣。薄暮上孤山。登望湖亭。以詩弔林逋而去。廿一日遊。

湖心亭。至內六橋。有客邀飲於梅花嶼。爲卜夜而歸。廿二日登保叔塔。觀落星石。已由瑪瑙寺後登初陽臺。臺高而平。盡湖山井邑之勝。下觀紫雲洞。洞倚空如懸。陰氣襲人。肌骨爽甚。已至黃龍洞。其地最僻。憩其中久之而歸。廿三日出古蕩。至佛惠寺。又至靈峯寺。小憩二寺。皆清幽岑寂。可以避世。已從間道觀仙人通天呼猿三洞。還至文昌祠。飯從金沙灘沿河歸舍。廿四日度萬松嶺。至勝果寺。松徑盤紆。澗淙潺湲。寺有月巖。石壁削立。有隙如鏡。月巖之右。爲宋殿前司營。其上甚平。石笋林立。森若朝拱。登其上。則南江北湖盡在履舄之下矣。已入天真書院。觀九宮八卦田。飯於天龍寺。廿五日登吳山。遊吳太守園。園多奇石。餽飭華頓。已入通玄觀。觀後修竹蔭庭。赤日無暑。已入金侍御園。登見越亭。是園雖小。遜於吳而極目遠眺。見諸山蒼翠。與水相盪。亦足以怡神。寄傲徘徊。其間久之而去。蓋弟茲來也。浹十二辰耳。度所得水之勝者什九。所得山之勝者什八。樵牧爲羣。冠蓋自遠。又且逢時而得天靡日。不晴靡地。不花涼不加。裕暄不解。襟斯亦人生所希。遘者。

從遊二君。盛生韶潤。朱子清通。談文則富。金谷中聖。則倒玉山。其他縉流道侶。亦有數人。濯濯自沐。超超入玄。皆於山水無媿色者。書以奉聞。吾兄當听然而哂於少文室中。爲我鼓琴而動操矣。

與蕭允升祭酒書

袁宏道

射堂夕月。西門春柳。猶記往日周旋否。屈指十年之間。故交落落。有若晨星。伯修墓上。白楊幾堪作柱。百念那得不灰冷也。山中蒔花種草。頗足自快。獨地荒。泉石都無。絲竹絕響。奇士雅客。亦不復來。未免寂寂度日。然泉石以松竹代。絲竹以鶯舌蛙吹代。奇士以蠢簡代。亦略相當。舍此無可關情者也。此近日未盡習氣也。遇有道者。不得不暴。以希懺悔。

答周象賢書

余寅

襄王書來。云從足下得不佞。是足下固嘗謬舉不佞於王前也。今諸藩擁挾高倨。聽嘗不遠。視嘗不下。庸知降意接辭。用布殷勤。延問疎遜。而襄王實先之。海內稱

襄藩世有賢王。今王愈益賢。不佞無徵。徵於謬焉。而與不佞良信。顧理緘而精繆。寶籙兼至。云爲其女郡君稱謝。不佞懽然怪之。古稱秩宗維清。今不幸諸胥交互。樛結一遇。諸藩祈請。輒指爲奇貨。恣其溪壑之心。及於事竟。而恩澤究非。賄不以也。主者旣莫肯批根而外間紛紛更多。次骨之論。不佞竊恥之。又敢以身爲招。甘自墮於臚者流。且始事在儀部。而膳部卒成之。不佞職司奉行案牘而已。何敢與聞。而居其勞也。固知王之嘉問。徒借此爲稱。顧不佞夙昔頗知分辨。誠不自安。竊比於素絲之風。退守小臣之分。謹以原緘。還授使者。惟足下察其愚心。壹陳於王。無以狂慙。竟成詆苛。不佞蘊戢。何涯之有。

與邵侍御書

余寅

三吳豪傑。想望風采久矣。何時按部。不佞與雲間朱察卿厚善。高懷至行。明白淳備。風流儒雅。海內少雙。而世不及躬。年不酬德。天上一失。少微吳中。遂無處士。較功成行。無忝鄉賢。伏乞躋之祀典。以光世德。謹撰長牋一通。用備財擇。并察卿傳。

四首呈上。且見平生沈明臣。王穉登。布衣錚錚。太倉王元美。最慎許。可華亭陸宗伯。恬退孤往。不屑卿相之位。其不以甘言語媚一鄉黨後生。明甚。同邑潘司寇。雅重察卿。誌察卿墓。不自立一語。而舉諸傳中語。固謂傳中語的也。察卿收不滿九百石。而公祖私給。別無取辦。兄弟宗親。視爲寄橐。履常尊滿。問遺四方。不絕於道。於是察卿遂貧。而察卿漫不省。察卿九子。一太學生。三縣學生。綽有父風。此皆箋奏所不及詳者。夫褒表善良。扶植風義。示以方向。歸之長厚。蓋有司鈞責而在。執事風紀。尤先儻蒙。鑑念一發。寤歎決以風霆。猶懼未迅。夫所謂按部者。非謂衣繡持斧。赫於觀聽。又非特循習故常。不爲世教裨益。萬分已也。此非察卿之幸。也不佞又何敢知焉。不宣備。

又答戚都護書

余 寅

曩歲麾下被命。解北塞之巨防。改南粵之輕寄。殊非處雄傑。慎邊徼之至慮。輒私喟歎。無乃廟堂失也。乃今并粵事釋之。許其謝事。縱之歸田。則廟堂愈失矣。且麾

下爵登三孤。權使萬衆。義在徇國。不有其軀。而況年未六旬。非懸車之日。趙壯侯馬伏波將軍。何人哉。麾下自爲計。誠得何至。忘我主上乎。自麾下南。而代者竟爲直指露章。摘發其隱以敗。使麾下而在。當不至是。故曰廟堂失也。今薊事日益艱困。以此見是時同事者。不惟共公難。而共私亦最難。麾下無謂書生。狂狂生在曹寂無一事。無以報主上。偷祿苟日直。誅首耳。何足塵遠問。至託名神與也。雖然亦幸。不值狂生耳。使生得面。何勝指數。麾下無謂高枕足娛。季龍雖死。晉憂方大。今俺酋斃。黃酋老病。扯力良驚。悍不減其祖。少時九陲所急。正須頗牧耳。狂生之言。固是異日者之左券也。麾下無終謂書生狂。

答沈虎臣書

姚希孟

長安碁局。祇宜旁觀。不宜對手。弟固旁觀人。而旁觀既久。則旁觀之旁觀者。誤以爲有所指點。而竊竊揣摩之。固不若拋却碁枰。自理樵柯之爲快。然偷閒看碁。觀破無限機關。比局終斂手。畢竟滿盤俱空。楚家漢家。蜀黨洛黨。皆碁也。弟正欲從

碁盤街上學出世法非學入世法也仁兄書中之語涉套已甚異日相對請試爛柯人眼力何如

答賀藩伯澹菴書

張居正

別楮一一領悉。夫人才難知。知人固未易也。不穀平日無他長。惟不以毀譽爲用。舍其所拔識。或出於杯酒談笑。或望其丰神意態。或平日未識一面。徒察其行事而得之。皆虛心獨鑒。匪借人言。故有已躋通顯。而其人終身不知者。如公所言。咸冀援於衆力。借譽於先容。若而人者。焉足以得國士而士亦孰肯爲之用哉。辱示略陳所以。自是誠宜忘言矣。

答湖廣巡按朱謹吾辭建亭書

張居正

承示欲爲不穀作三詔亭。以彰天眷。垂有永意。甚厚。但數年以來。建坊營作。損土儲勞。鄉民日夜念之。寢食弗寧。今幸諸務已就。庶幾疲民少得休息。乃無端又興此大役。是重困鄉人。益吾不德也。且古之所稱不朽者三。若夫恩寵之隆。闕閱之

盛。乃。流。俗。之。所。豔。非。不。朽。之。大。業。也。吾。平。生。學。在。師。心。不。靳。人。知。不。但。一。時。之。毀。譽。不。關。於。慮。卽。萬。世。之。是。非。亦。所。弗。計。也。況。欲。侈。恩。席。寵。以。誇。耀。流。俗。乎。張。文。忠。近。時。所。稱。賢。相。然。其。聲。施。於。後。世。者。亦。不。因。三。詔。亭。而。後。顯。也。不。穀。雖。不。德。然。其。自。許。似。不。在。文。忠。之。列。使。後。世。誠。有。知。我。者。則。所。爲。不。朽。固。自。有。在。豈。藉。建。亭。而。後。傳。乎。露。臺。百。金。之。費。中。人。十。家。之。產。漢。帝。猶。惜。之。况。千。金。百。家。之。產。乎。當。此。歲。饑。民。貧。之。時。計。一。金。可。活。一。人。千。金。當。活。千。人。矣。何。爲。舉。百。家。之。產。千。人。之。命。棄。之。道。傍。爲。官。使。往。來。遊。憩。之。所。乎。且。盛。衰。榮。瘁。理。之。常。也。時。異。勢。殊。陵。谷。遷。變。高。臺。傾。曲。池。平。雖。吾。宅。第。且。不。能。守。何。有。於。亭。數。十。年。後。此。不。過。十。里。鋪。前。一。接。官。亭。耳。烏。覩。所。謂。三。詔。者。乎。此。舉。比。之。建。坊。表。宅。尤。爲。無。益。已。寄。書。敬。修。兒。達。意。府。官。卽。檄。已。行。工。作。已。興。亦。必。罷。之。萬。望。俯。諒。

與某幕府啟

陸可教

伏。以。節。駐。西。郵。兩。屆。綵。絳。之。候。賜。分。北。闕。再。貽。紈。綺。之。珍。方。觸。熱。之。是。虞。伊。執。清。

之。有。望。恭。惟。門。下。峻。節。霜。凝。雄。才。電。掃。黃。鉞。一。下。旋。收。六。月。之。功。白。羽。載。揮。將。息。三。川。之。瘴。仁。風。慰。黎。庶。未。酬。雅。對。於。袁。宏。盛。暑。來。故。人。轉。挹。清。塵。於。庾。亮。驟。覩。八。行。之。麗。詎。誇。五。字。之。奇。皎。皎。寸。心。遙。想。峨。帽。之。半。月。綿。綿。遠。道。坐。分。巫。峽。之。長。巖。期。把。握。以。不。忘。愧。奉。揚。之。無。地。謹。謝。

答傅商盤書

趙南星

曩者次小兒生。辱足下雅念。缺然久不報。茲復遠沐損書。具見道義之情無已。每念足下英妙寡二。而德讓自將。此夫天奉之者也。翰林固公輔之區。而公輔之罕。良亦由之。白首章句。非仕。非學。於世務不獲通。涉竟不能深。垂頭塞耳。作婦女之檢押。謂之相體。而德業壞。以文章爲職業。朝種夕穫。不暇研思。極覽屑湊。粉飾人。人如一手。而文章壞二者。非豪傑鮮克自拔。惟足下努力。拜惠之侈。非足下所宜。敬謝不恭。恕恕。

答沈將軍書

董應舉

某雖文弱。却喜武壯。嘗謂武夫可爲文士。助者三。捨命一也。決氣二也。直腸三也。文士得此。方能有益國家。今之武夫。好爲文。以取悅縉紳。舉甚笑之。舍其所有。事而徒事於浮游。斌媚之觀。此有識文人所自悔者。而將種亦爲之耶。將軍義俠武節。少年從塞上。殺虜擲之市中。無慮數百。便宜出海。不爲文法。牽拘竟能。呼叱馮夷。赭倭黑水。不獨號令指揮三軍。加勇而無戰。不爲士卒。先長刀。厭血短劍。朱腥使屬甲者。皆若將軍無虞寇矣。今天下洶洶。有不可知之事。遼陽爲甚。將軍其何策以弭千古英雄。只拚一死。便足壓倒古今。忠臣孝子。俠士節夫。與夫蓋世之勳名。雖作用不同。根基皆從此立。文士有口而已。何用哉。願將軍自愛。捐軀報國。會有其時。

答朱座師書

董應舉

潘生行。曾附起居。不知到否。承示貴鄉士夫口語。師命在磨蝎。自應得此。在庶吉士時已然。何曾妨害大事也。當道引重。監司守相及門。固不得爲斬絕崖異之行。

然終寡接爲貴不唯避嫌遠咎在家居鄉士夫體亦應爾日月可望不可卽所以爲貴若在人間人人得措手抱持恐亦褻之矣與人交厚最難不惟防人累我亦且防我累人世之求多師者未能盡息閉門則聲息俱寂應接則因影生形忌我者不難及人恐於當道無益也師以爲何如

答范異羽書

董應舉

向者薄奠年母几筵僅抵雞絮耳乃煩手札勤渠中以純紉侑以扇頭甚感甚媿其中誘獎甚溢謙挹過當所謂與人爲善之盛心不難以己下焉者所謂都門情事尤足以見兄之直願充而養之以至於浩然男子要爲天下奇此身之在天地間不啻渤澥之亮然狂風猛浪蕩之與爲上下江海固失其大焉吾輩果可遂少於天下耶不可知不可少於天下邪不可知要所自立要忖之此心而已愜心雖身可捨況身外浮物耶盡心雖天下不可外可自認軀殼耶弟嘗妄謂經天下學問無他只是捨不惟捨利捨官且捨其難割之名與難却之情能却難却之情

能割難割之名。則天下無不可爲矣。要之有本在知天。知世界事。皆天。則無所用其安排。我因蕩蕩焉。知日用隱微。皆天。則一毫不敢放恣。我因戢戢焉。蕩蕩則心大戢戢。則心小心。天相對我。始得爲我矣。吾輩要看身甚重。亦要看身甚輕。看身甚重。則不敢負天。看身甚輕。則不至累其靈臺。必能輕身。乃能重身也。年兒以爲何如。

與沈箕中書

屠隆

足下得閒曹。適矣。乃僕爲令。亦不惡也。僕曩不解事。從人言苦令。夫令奚苦矣。理勢治劇。非令不效。振刷調劑。非令不行。精明果斷。非令不見。寬仁惠和。非令不宣。士朝弛負。擔莫列薦。紳綰符佩。印展布四體。丈夫何不可哉。又世之所爲難色者。徒以令磬折。諸公間丈夫抱藝。幸遭遇一時。與甲乙之科。不能獵上第。登清華。軒然高蹈。榮名振藻。而沾沾兒女。向人工眉。嫵取憐。當世辱在泥塗。非夫也。嗟嗟不然哉。士苦修名不立。夫磬折奚苦矣。軒轅位居黃屋。號爲至尊。而膝行前。廣成

子。周公身都將相。吐哺以勞天下士。正考父一命而僵。再命而僂。三命循墻而走。魯之賢者。年七十猶恭也。士苦修名不立。夫磬折奚苦矣。僕爲小吏淮泗之上。朝夕兀兀。扶伏奔走將迎。下以和柔萬靈。而上取憐尊官長者。內存狷潔。外飾膏沐。望見其眉嫵者。何物長卿綽約。若爾謾罵則受之。呼牛馬則應之。睡則乾之。發於餘竅則承之。彼怒而卑辭和顏退而置之矣。諂讓而謝過背而胡盧之矣。故朝夕兀兀則無竄其業也。扶伏奔走將迎則無虞其患也。爲眉嫵取憐則無逢其怒也。逆而順之則無滑其和也。磬折奚苦矣。此非所謂剡方毀行而以絜楹也。余蓋以爲玩世者也。夫玩世之樂爲娛大矣。所居淮泗北折而苦。縣則伯陽產焉。南折而濠梁莊生之所家也。東西去百里而近。爲潁壽潁古潁川。歐陽文忠蘇長公宦其地。有西湖潏潏十里可泛也。壽古淮南八公山在焉。馮高而眺之。如落几席。八公可揮手招也。又雲氣時時起。芒碭諸山長歌大風。風輒肅肅至矣。城下新隄初成。度支可萬金帑。有一錢乎。亡之則秋毫民力也。秋毫民力而民不怨者。何僕無他。

材。能。終。日。百。拜。而。勸。之。用。其。愚。也。愚。所。以。誠。也。隄。成。乘。月。臨。流。望。焉。水。光。凝。碧。遊。魚。上。下。雲。物。四。揭。六。合。曠。朗。爽。然。快。哉。恨。不。得。命。沙。棠。取。卮。酒。呼。沈。郎。而。夜。泛。也。僕。不。佞。爲。令。樂。如。此。令。苦。余。而。余。不。苦。令。令。如。我。何。足。下。無。挾。白。雲。司。驕。我。雖。然。余。竊。有。大。懼。焉。世。俗。情。深。風。雅。道。喪。聲。譽。日。增。人。品。日。減。則。令。之。故。也。曩。固。與。開。之。言。之。矣。余。不。苦。令。令。亦。何。樂。也。余。終。黃。鵠。舉。矣。嗟。乎。沈。郎。努。力。雲。霄。上。報。人。主。下。光。友。朋。竹。帛。之。事。足。下。圖。之。

與沈君典書

屠隆

都。門。把。臂。眷。焉。傷。離。嚴。霜。載。零。玄。雲。四。馳。天。寒。以。風。白。日。爲。速。僕。也。壯。士。能。無。破。顏。子。惠。好。我。爲。我。技。涕。事。在。昨。日。歎。易。歲。乎。思。疇。昔。作。吏。行。李。戒。途。子。與。箕。仲。元。孚。以。德。開。之。二。三。兄。弟。勞。我。良。苦。歎。留。拳。拳。中。夜。徬。徨。相。視。永。嘆。北。斗。闌。干。同。袍。之。情。可。謂。篤。至。僕。不。能。從。命。也。子。歷。天。路。我。行。畏。途。九。月。去。國。十。月。渡。淮。仲。冬。始。奉。老。母。涉。穎。簿。書。山。積。吏。事。川。湧。折。腰。而。趨。公。府。低。眉。以。見。上。官。扶。伏。道。左。望。塵。

遙拜屏息。車下不敢出聲。泥沙在衣。風塵擣面。丈夫之氣摧頽盡矣。且欲行寬大。則牽於深文。議息肩則苦於督責。強項者爲傲吏。繞指者爲通人。逢迎者爲忠厚。砥志者爲沽名。尙鷲悍者爲幹敏。行古道者爲迂闊。俯仰高厚。常苦踟躕。平居邑。邑黯乎不歡。臨風念子中心。若結。謂足下奮翼雲漢。優遊清華。方且立交戟之下。侍承明之廬。奏凌雲之賦。扈淇泉之駕。偃息乎虎觀石渠。儼焉天上。而乃二月以告聞矣。夫寵靈恩澤。人情所藉。足下當鵠起之秋。遭龍變之會。順風而呼。乘時振響。逍遙歲月。公輔可立致也。何爲得意。自苦居寵不樂。閉門下榷。有如窮愁懷賈生之憂。抱劉向之憤。脫屣富貴。榮華秋毫。語云。高臺悲風。烈士悲心。足下不能脂韋。突梯坐取尊官。上光九族。下媚妻子。此如噉日鬼神所知矣。方足下不得志時。固常走九邊。臨大漠。握將帥觀壁壘。履黃沙之上。臥霜月之下。歸而招置賓客。結納豪傑。家散千金。日食萬錢。意氣於世無雙。及衰然舉首。晉登華秩。顧反。嗷嗷溫厚折節。下人憐瞿子於困窮。拔屠生於稠伍。一言稍合。輒布腹心。洞觀始終。高朗。

粹。白。何。者。非。雄。豪。丈。夫。之。致。哉。卽。彼。榮。華。視。於。何。有。而。能。依。阿。取。憐。坐。獵。高。貴。曩。僕。固。知。足。下。必。有。今。日。矣。若。神。龍。可。繫。安。名。爲。神。足。下。今。狀。元。及。第。名。在。清。班。朝。而。煙。霄。莫。而。林。壑。明。星。有。爛。卿。雲。在。天。四。方。誦。義。士。林。動。色。用。匡。皇。國。光。我。同。袍。豈。不。雄。快。何。必。旦。夕。公。輔。闢。茸。通。顯。然。後。爲。得。意。邪。故。人。相。知。以。賀。不。以。唁。僕。今。辱。在。下。走。事。多。牽。制。殊。不。快。心。而。猶。蹭。蹬。一。官。眷。戀。五。斗。由。足。下。言。之。奚。翅。腐。鼠。之。與。鷓。雛。哉。足。下。今。歸。且。高。臥。落。敬。亭。之。雲。醉。呼。李。白。誦。澄。江。之。句。長。揖。玄。暉。僕。且。又。視。足。下。於。天。上。矣。僕。願。足。下。益。自。愛。方。今。聖。明。在。上。雲。龍。旣。遘。魚。水。自。投。無。令。泉。石。情。深。煙。霞。成。癖。何。必。巢。許。卽。如。姬。孔。不。可。謂。非。人。豪。謝。朓。青。山。終。非。卿。家。物。也。東。望。故。人。大。江。間。之。再。拜。使。者。神。與。書。往。

與呂玉繩書

屠隆

殘臘別足下。除夕前一日始抵家。老母荆妻倚閭良切。私計不佞從方外人於雲山。煙水間必且攜單瓢隻履入五岳。采真不復返。自爲揮手謝時人計得矣。如一

家。八。口。何。蓋。歸。入。門。如。從。雲。中。墮。不。啻。丁。家。令。威。三。千。年。歸。來。而。猶。及。家。人。無。恙。
喜。可。知。已。追。維。宛。上。與。玉。繩。周。旋。把。酒。謝。公。樓。煙。雨。溟。濛。河。山。迴。合。飛。瀑。濺。人。衣。
冷。風。飄。人。語。羣。公。隱。囊。紗。帽。道。人。白。鬢。黃。縑。搔。首。踟。躕。俯。仰。上。下。千。古。欲。空。六。幕。
猶。隘。昏。黑。下。山。而。設。榻。精。舍。一。燈。熒。熒。繡。佛。爲。鄰。伊。蒲。作。供。架。繙。秘。檢。鼎。爇。異。香。
主。人。易。輕。衫。躡。文。履。膚。神。雙。清。玉。山。朗。映。微。言。名。理。霏。雪。裁。冰。足。使。平。子。解。頤。洗。
馬。杜。口。而。秀。淑。溫。潤。之。氣。漸。來。襲。人。蕩。其。穢。粗。銷。其。鄙。滯。夜。分。就。寢。則。天。空。籟。寂。
雨。聲。瀟。瀟。在。池。篠。間。曉。起。推。窗。獨。鳥。窺。門。羣。麝。飲。澗。白。雲。晶。晶。冒。前。嶺。主。人。則。呼。
奴。攜。天。池。佳。茗。焚。扶。南。好。香。復。共。清。言。移。晷。數。日。裴。回。神。骨。蕭。爽。如。在。閩。風。瑤。水。
上。不。佞。細。警。玉。繩。機。神。激。朗。德。器。溫。粹。嘗。私。問。君。家。僮。奴。爾。主。人。居。恆。有。怒。罵。乎。
答。云。甚。少。盛。怒。詈。奴。輩。以。癡。兒。何。乃。爾。如。是。便。已。昔。劉。文。饒。寬。中。魏。陽。元。長。者。以。
爲。世。恐。無。此。人。乃。今。於。足。下。良。信。

與陳立甫書

屠隆

蓬戶掩兮井逕荒。青苔滿兮履綦絕。園種邵平之瓜。門栽先生之柳。曉起呼童子。問山桃落乎。辛夷開未。手甕灌花。除去蟲絲。蛛網時不巾。不履坐北窗。披涼風。忽見異鳥來鳴樹間。小勸竹牀藤枕。一覺美睡。蕭然無夢。卽夢亦不離竹坪花塢之旁。醒而起。徐行數十步。則霞光零亂。月在高梧。妻孥來告。詰朝廚中無米。笑而答之。明日之事。有明日在。且無負梧桐月色也。婦亦頗領此意。相對怡然。

與郭篤卿書

鍾惺

弟生平不喜星相。尤不喜星相之極驗者。凡以人生禍福。妙在不使人前知。若一前知。便覺索然。且多事矣。弟所知陳生。則星家之極驗者也。以弟不喜其術。欲去而之。佗想兄與弟同好。惡亦應不喜此術。而世上如我兩人者。百無一二。則陳生之遇者。百而不遇者。亦一二也。幸隨分推廣。但莫薦之鍾伯敬一流人耳。

上家大夫書

茅維

大人道探玄笈。壽享耆齡。寄蹟寰中。棲神物外。邇來世網頓屏。靜樂漸臻。是以杖

履日康。七箸益健。雖曰天錫。詎非人修。乃者帝賚。洪加仙侶。游至黃冠。赤烏綠髮。脂顏相與。掩映乎臯林。婆娑於泉石。導服五氣。講鍊九還。飯則胡麻。七飛飲則松花。五粒羽儀。郁耀閭里。賦觀竊嘆。紫氣之來關。共指丹梯之拾級。維也執雉師門。粗承指教。兼日盛舉。敢不揚言。三老之圖。既成五島之仙。奚賞謹向風稽首。獻納頌章。且末志規箴。代當尸祝。蓋金仙可遇。求之不在蓬閬。丹鼎易就。鍊之非絳鉛汞。惟願鴻冥。一世龍蟄。千年照四大。以空花伏三魔。以慧劍爰清。爰靜無思。無爲老聃。得之以成。立牝喬松。得之以享。玉粹故知長生。無生指歸。游於無礙。在世出世。道奧盡於寡營。伏見大人仙骨夙成。立宗雅振。比肩綺皓。攜手浮丘。縱未白鹿可騎。豈無丹砂能益。顧書有曰。凡人既見聖。亦不克由聖。又詩有曰。如彼築舍於道謀。是用不潰於成。蓋歎惜有終之鮮克。不專之罔功也。夫我躬不閱。遑恤後人。人壽幾何。崦嵫坐老。愚者不爲悔。庸有及乎。維實固陋。不知所云。顧嘗頌法二氏。慷慨古昔。每讀秦皇而失笑。思武帝而太息。若乃悟不早。於黃犬。戀不出於周廬。

諒在。高。明。睡。之。久。矣。懷。書。累。日。趨。起。未。敢。上。謁。伏。願。大。人。寬。其。文。法。覽。其。拳。拳。儻。以。所。獻。贊。頌。言。有。足。采。請。得。再。拜。書。之。圖。末。以。傳。永。久。夫。家。庭。賡。歌。稱。觴。侑。爵。亦。古。今。之。美。談。上。下。之。樂。舉。也。惟。大。人。許。之。不。勝。幸。願。

與屠緯真先生書

茅維

頃以覆瓿塵覽。輒荷獎借。至許以碑礫纓絡而爲紕首。僕不佞感激無地。僕自十五稱詩。早負通譽。年少情侈意奢。遂謂才猷所逞。可如鳶肩火色。飛騰無上。黃初六代一舉而掩之耳。於是五言諸體。上宗曹劉。下規江鮑。篇摹句琢。酷有形似。頗閑閨閣之柔情。亦擅邊塞之淒韻。然而比年以來。所見行復稍異。大抵謂詩之爲道。在於闡緯性情。包括天地人各具一胸臆。詩各具一鑪錘。後不襲前美。古不掩今。勝南轅而趨郢。期無北指而已。至於棄我面目。學步邯鄲。不過剽竊前人聲偶體裁之一二。而輒囂然謂我能襲古。此優孟所以抵掌於叔敖也。况沐猴而冠者乎。善擬議者。通於變化。九變知貫。則古反爲奴。我反爲主。鼓而御之。升九天潛九

淵。何。之。不。可。世。則。殷。武。迄。於。李。唐。體。則。朝。廷。延。於。里。巷。人。則。仙。靈。尊。宿。以。逮。於。閭。媿。田。峻。抒。寫。既。真。音。旨。自。暢。數。曲。而。外。往。往。堪。傳。詩。果。務。多。求。乎。哉。我。明。肇。興。詩。道。蔚。然。可。以。駕。唐。軼。宋。而。聞。諸。名。家。之。論。不。無。奧。主。杜。陵。自。乏。門。戶。於。是。名。篇。秀。句。膾。炙。藝。林。而。求。其。星。河。璀璨。江。海。倒。射。之。文。亦。罕。儷。矣。僕。竊。懷。懷。有。庶。幾。之。心。而。才。短。識。闇。如。敝。飄。遇。衝。波。臨。流。望。崖。輒。悸。欲。返。先。生。於。茲。所。謂。一。葦。作。寶。筏。將。溯。溟。渚。而。躡。崑。崙。何。以。援。僕。千。金。之。壺。令。不。爲。溺。者。笑。乎。所。呈。鑑。一。編。實。弱。齡。夢。囁。中。語。而。敝。帚。自。享。遂。副。殺。青。自。甲。乙。卷。有。繹。志。詩。怨。歌。等。什。略。見。感。憤。跋。扈。稱。雄。然。欲。以。此。當。古。人。恐。遇。周。客。一。發。櫝。而。掩。面。走。耳。僕。今。傾。囊。倒。篋。歸。命。先。生。儻。先。生。清。覽。之。暇。不。以。美。以。規。慨。然。直。以。古。人。勗。我。僕。雖。不。敏。敢。不。徒。祖。超。距。而。前。以。期。無。辱。命。於。先。生。乎。適。座。客。作。劇。裁。書。不。能。周。悉。東。望。鶴。馭。徒。有。神。馳。

報吳允兆書

茅維

前使者還。行有酒會。匆匆作累語報足下。亦可矇也。足下識鑒精玄。意旨遠暢。今

人殆不可兩。而推挹弟獨過當。讀小集中所筆削。語語痛快。數年苦吟。爲足下一覽。都盡。至欲弟棄脂澤。等土苴。韜光剗彩。惠教良深。敢不佩服。弟雖樸樾一豎。斐然之志。不降於古。得足下互爲商榷。鬱興其文。升堂入室。亦或非難。蓋四始彪炳。六義淵微。後之詞人。雖代興其間。而誰能卸其籓籬。自爲馳驟。左徒之宛麗。文園之綺宕。遡流窮源。莫不祖述國風。而比事連類。獨標興體。則三閭獨倡。不可誣也。至五言盛於蘇冠軍。而延年復以曼聲協律。掎撫古辭。定爲樂府。其結體譔思。婉轉巧似。初無異響。故枚叔九首之製。傅毅孤竹之什。漢世咸稱佳篇。而與芝房寶鼎。赤雁桂華之曲。體裁標尚。寧有二乎。黃初一變。曹氏號稱三祖。而孟德獨雄。迨江左琢磨日勝。而質非其文。所謂一解不如一解者也。蓋徒能襲朱馬之華。撮齊楚之氣。而哀綺淫濫。遺風斯渺。貞觀創爲近體。聲偶益拘。於是青蓮擅其駿逸。少陵號爲沈雄。而原其變幻。風雅錯鏤。金玉名篇。秀句往往拾之。齊梁間耳。乃知詩者。才有獨擅。致有獨會。麟麟標標。孰能等齊。而一經一緯。一宮一商。猶僦輸之有。

規。矩。川。瀆。之。有。河。海。如。去。其。聲。輓。會。其。立。輿。則。里。謠。氓。謳。可。和。金。石。薦。闕。庭。況。騷。
爲。八。風。之。變。聲。賦。爲。四。始。之。一。體。樂。府。仍。增。損。于。古。辭。而。可。謂。義。非。攸。通。文。無。相。
接。者。耶。足。下。云。古。人。多。以。樂。府。之。趣。入。律。而。青。蓮。獨。勝。斯。論。誠。然。弟。竊。以。爲。詩。至。
樂。府。其。變。悉。備。其。文。尤。精。青。蓮。苦。心。於。茲。擬。述。殆。遍。機。殼。已。開。故。其。握。牘。持。管。思。
疊。不。窮。才。敏。獨。絕。然。比。之。正。始。不。過。庾。徐。之。雄。伯。尚。非。潘。左。之。勁。敵。也。今。世。操。觚。
非。乏。人。而。合。作。者。頗。不。易。得。試。能。包。顯。宇。宙。縱。橫。古。今。參。之。國。風。以。取。其。宮。參。之。
雅。頌。以。取。其。溫。參。之。騷。賦。以。取。其。恢。奇。參。之。兩。漢。黃。初。以。取。其。氣。餘。綜。博。而。驚。精。
寫。真。而。旨。遠。得。之。於。中。不。摹。自。合。則。何。選。何。律。何。六。代。而。又。何。有。於。初。盛。唐。哉。弟。
質。闇。不。能。博。覽。又。十。九。束。於。鉛。槧。向。所。強。著。佩。鱗。一。編。尤。淺。率。不。能。滿。志。其。於。四。
始。六。義。之。變。猶。跬。嵩。華。而。未。離。跬。步。也。然。不。諱。醜。陋。媿。媿。爲。足。下。陳。者。雖。云。恃。惠。
子。之。知。我。亦。欲。就。正。足。下。勉。旃。自。奮。所。謂。假。蘭。筋。於。六。駮。借。勁。翻。於。晨。風。良。時。在。
卽。勗。之。而。已。惟。諒。察。

上敬菴許公司馬書

茅維

自明公筦戎樞。鎮江表。南中數千里。安若覆孟仁人之利溥矣。而遠邇方聞之士。又盛頌門下覲武之暇。鬱然弘文。延徒宣講。闡仁揚義。闢支離之解。述性命之宗。方今俗學迷津。人務夸名。而闢大道。明公夙以真儒。慨任當世。爲千聖說鈴。爲四方振鐸。遠則河汾禮樂。近則新建勛榮。詎非明公兼有盛事哉。不肖維一章句末學耳。辱明公不鄙。重加宏獎。嘗夙夜凜凜。庶幾勉旃。而偃蹇世途。絀鬱塵網。違才而使之靡所見。長譬如檻猿。瓘虎。熒然無能。與鼯鼠比。捷然猶決躡。剉齒而性未易馴也。自念爲諸生數年。再獻再刑。將嫁而游上都堂上。白髮如縞。不得且暮紆青拖紫。醕觴稱壽。而復以少子遠涉。爲高年憂。雖幸仲氏承歡。無乏奉命登車之日。心如搖旌。誦陟屺在原之詩。能無悲乎。伏見中原騷然多故。災沴被野。戎馬躡郊。而緹騎中涓。旁午騷驛。銓曹樞局。曠員缺理。恐扁和之憂。不在肌理。而在縈衛。無論明公朝之柱石。行當拊髀興嗟。卽在維等。不免以藿食而懷杞憂。今茲秣馬。

垂纓峨冠。緩帶周旋。京洛磬折。公卿政可。達時宜之。變設橫縱之策。慷慨詆辯。驅馳艱難。惟明公爲今之仲山。吉甫四海士人。倚若司命。將何以折狂狷。嚶嚶之氣。約之中行。而使得實效乎。昔機雲入洛。張司空爲之流譽。名傾都下。劉越石心存晉室。經略北方。則遺溫嶠。通問江左。今觀明公碩德巍望。十倍茂先。行被內徵。勢異越石。然維區區之私。所望援於明公者。意未敢後古之人也。當路憐才好士。雖不乏人。然非得明公。加月且而列人倫之目。何以令孫陽。假盼釋負鹽車。至如季世末俗。多毀忌盈。世祿之家。雖有屈產。照乘。必折而被擲。揄明公目擊非一。則維眇小七尺。且倚明公一言爲干櫓。寧詎止假金僕姑爲先驅乎。展轉寸懷。誠發寤寐。遂不揣疏陋。介然自通於執事。

答陳赤寰書

熊廷弼

弼自甘廢棄久矣。一經詬逐。無復世情。幾載耕農。苟活性命。不圖公朝誤舉。遂及虛庸。早夜思維。但深慙悚。況以一盤全負之局。而冀一撥卽轉之功。則無子空枰。

何憑。下手旁觀冷眼。誰與點籌。羣公苟旦夕。以爲安。九重置緩急。於不問。似此時。勢安。卜所終。此弼之所以。日夜驚皇。而大悔。出山之誤者也。足下當何以教之。

與高景逸總憲書

周順昌

朝事至此。眞漢唐宋未有之黨禍也。吾輩一身不足計。惟目覩六君子之慘毒。直使人肝腸摧裂。不復有處世之想。可奈何。可奈何。然畢竟成就一小人之愚耳。不肖杜戶息交。近爲先人營葬。山行居多。夢寐清光。恨不能縮地一吐其憤鬱。忽得台札。更從仲通華兄備悉近況。甚慰鄙念。此兄骨膽氣誼。迥超時俗。佳士佳士。但其加意過厚。當之者不深愧耶。草勒布衷。百不一盡。

與葉園適書

高攀龍

足下狷而知裁。駸乎中行矣。兩年兩與足下連宵之話。退而自惟。每媿不及足下。闇然內充。令人心融氣平。弟望此境而未見也。第足下精神氣魄。太近收斂。其弊欲入於佛老。不可不察。朋友相與。須盡力砥其失。方有進處。弟施矣。足下不可不

報大塊百年中偶爾相遇毋相孤負也。

與孟雲浦文選書

鄒元標

人眞人也。官假官也。吏曹假之所從出。乎假者居其地。密情縟儀。送往迎來。厚同鄉同年。舊僚舊交。預報陞除。曲爲應援。此感其小惠。彼稱其厚德。是人亦得微名。仕途仕途。亦誤採而用之。弟嘗竊觀之。譬之藤蘿。左纏右絆。非大斧利刃。不能割斷。大丈夫寧爲轅駒。無爲社鼠。寧爲蒼松。無爲藤蘿。多少英雄。誤入此坑塹矣。若吾兄昂首何似。易曰。過涉滅頂。願三復其言。弟願兄無迷本眞。若曰。本無眞假。無作眞假。視則弟當三緘矣。

與鄧定字書

鄒元標

白雲居士金帶懸腰。我本無心富貴。奈何富貴逼人。莊定山家棲三十年。赴部補官。李西崖閣老曰。定山衙門出色人物。當優之。丘仲深曰。我不知所謂定山也。仍補南郎中。丘又曰。引天下士叛君父者。此人先朝號稱隆盛時如此。羅文恭晚年

私與門人曰。官家以國師禮處我。我故一出。乃嚴分宜之徒。每得文恭書。把翰回環。曰。達夫。達夫。老夫。不會用。得你。已。又曰。名高了。嘉靖時。如此。章文懿數起不赴。國師必赴。文懿官雖尊。然平生國學。稍有施爲。餘不過大官中夜思量。君父之義。文懿必有怛然。不自安者。不肖先年。以出處之義。商之諸老。及先生與念兄。僉云。當出。弟亦以老慈。年高七十餘。乘所得沾一命。人子之心。稍慰。遂無復留滯。卽播弄不悔。今亦甚喜。白雲菽水。眎昔時所得良多。太君年八十餘。畫舫相將。江魚竹笋。進則振鐸。歸則戲綵。何所不得。惟先生圖之。熟計之。清靜之士。特優於躁進者。若龍德正。中大人。則有間不加不損。知性者。出處視之一也。惟有以教我。是祝。

報謝伯子書

黎遂球

別承良規。以弟英風。太露爲戒。因往復深思其說。生今之時。謂恐以此忤犯時忌。取死耳。弟歷遍江淮燕代。覺比來流氛所過。其間士大夫遭之者。或奔逃而死。或獻城犯法而死。豈盡以此故。其果有英氣者。則戰鬪而死也。又孰吉孰凶。且夫人。

身。自。年。閒。修。短。同。歸。一。死。以。萬。石。君。之。數。馬。足。焉。而。死。以。灌。夫。罵。座。焉。而。死。楊。惲。種。豆。爲。萁。之。詩。取。死。固。也。馬。援。貽。書。教。子。誠。言。人。過。卽。以。是。書。言。人。過。取。咎。天。下。亦。安。能。盡。得。趨。避。乎。求。其。無。失。吾。所。當。然。者。而。已。

辭建坊啟

秦 鎬

鎬。啟。前。者。建。坊。之。請。業。已。非。分。求。辭。今。茲。憲。檄。之。頒。又。爾。僉。謀。議。舉。庀。徒。伊。始。戒。事。有。期。伏。念。金。屋。輝。輝。嫫。母。安。身。而。忸。怩。響。廊。嬈。嬈。西。施。振。屣。以。從。容。履。坦。無。虞。負。乘。可。懼。或。以。鎬。處。父。母。兄。弟。之。間。微。涉。艱。苦。此。譬。之。荼。與。檠。甘。苦。自。知。他。人。食。之。無。味。或。以。鎬。當。山。水。友。朋。之。際。小。有。唱。酬。此。譬。之。虻。與。蛩。喧。寂。自。解。令。人。聽。亦。無。音。乃。居。然。豎。嵯。峨。於。晚。風。殘。照。之。餘。遂。覩。焉。標。姓。字。於。大。市。通。都。之。內。石。亦。有。語。山。豈。無。靈。如。無。故。而。加。鞭。神。應。譴。責。儻。非。情。而。下。拜。鬼。且。擲。揄。在。安。民。愁。欲。引。刀。將。聞。之。而。逃。必。且。塗。名。易。姓。在。輪。扁。恥。爲。執。鑿。卽。呼。之。而。至。亦。難。得。手。應。心。且。居。高。者。危。穩。莫。穩。兮。翠。篠。千。竿。匿。影。況。吾。老。也。賤。樂。莫。樂。兮。黃。茅。一。把。蓋。頭。謹。開。

臆。以。陳。辭。省。得。名。虛。起。謗。冀。矜。愚。而。轉。達。免。教。寵。過。生。災。朗。嶽。好。存。龍。山。無。恙。問。何。峰。堪。侔。峴。首。願。留。爲。邦。良。守。令。墮。淚。之。需。看。幾。片。可。代。燕。然。請。截。爲。鄉。賢。大。夫。勒。銘。之。具。謹。辭。

示門人饒子正書

章世純

古。人。有。言。曰。但。常。無。禍。不。常。有。福。身。以。生。爲。常。富。貴。其。寄。也。夫。福。祿。富。貴。豈。獨。不。數。得。哉。亦。不。宜。有。也。故。國。之。善。慶。家。之。吉。祥。皆。不。欲。多。今。日。一。得。皆。異。時。一。失。猶。之。觀。花。遇。其。增。益。豈。不。絢。哉。然。所。增。者。後。之。懽。悴。也。陳。大。士。舉。子。而。不。樂。問。之。曰。多。子。孫。甚。善。然。異。時。者。又。多。一。哀。樂。事。矣。故。福。者。人。所。懼。不。來。或。又。有。來。而。懼。者。不。欲。造。得。以。生。失。知。得。失。之。相。成。也。行。周。行。者。亦。樂。其。坦。耳。適。有。高。山。在。前。將。促。步。而。登。之。登。百。尺。必。下。百。尺。登。降。之。數。增。減。相。平。無。得。於。高。也。而。我。已。踣。膝。繭。踵。徒。以。爲。足。楚。矣。人。之。生。哀。樂。以。自。傷。也。何。以。異。此。天。之。生。我。以。害。我。也。生。我。者。固。生。我。以。死。是。徒。爲。死。也。刻。木。爲。神。神。已。成。矣。而。析。之。然。則。非。成。而。以。爲。成。也。成。而。

以爲析也。故天地無恩而有毒。萬物無樂而有苦。

與友書

范景文

自老先生之由秉銓而當揆也。敦素絲之節。佐更絃之治。使中外凜凜。轉念戢志。以奉條章。主權以尊。國威斯張。維國有人。益不其大哉。而復苦心調劑。隱護善類。此其功在不見不聞之地。仍留一二老成以衛社稷。此又天下不及盡知而某私心自亮者也。自顧越在放廢。澤畔行吟。不敢以姓名上通長安。屏退之分。固應爾爾。且聞龍門日峻。辱在知契。誼當相體。卽託庇實宏。而門外自遠。曾言此意於程長孺。想當灼察。不以爲訝也。正在沈病。就醫京口。概行謝客。無所見聞。忽傳怪事。令人愕然。就中委曲。不得而悉。惟當寇亂內訌。患切剝膚之時。而擎天之柱。濟川之楫。不以支危廈而度驚湍。天下安知所屆耶。特遣急足。恭行問訊。今而後乃敢伸紙布悃。勞苦如常。以少贖從前疎節之譽。惟汪度其鑒之是荷。

與會稽陸公子書

陳子壯

隆德之報。知老師激義殉忠。天地爲震。而子壯不能匍匐往救。自顧七尺。安用苟存。一腔熱血。更揮灑於何所也。然是役也。老師靈歸河嶽。氣耀日星。逝之日。卽其生之年。徒執恆象之私情。蒼茫籲號神之聽之。又安知其不啞然而笑乎。引望遙奠。復爾遲遲。所冀不見吐於祝人者。亦恃以昔日之事。師爲今日之哭。師耳。諸卹典機會有湊。有不湊。貴紀綱可得其詳矣。師母起居無恙。還望兄輩多方善慰之。篋中遺書不少。幸善讀而無令散佚乎。甥家之事。宜就貴戚中老成深謀者與處分。但得妥則已。無事深求。百凡關切。

讓馬瑤艸書

王思任

閣下文采風流。之情義俠。職素欽慕。當國破衆疑之際。爰立今上。以定時局。以爲古之郭汾陽。今之于少保也。然而一立之後。閣下氣驕腹滿。政本自由。兵權獨握。從不講戰守之事。而只知貪黷之謀。酒色逢君。門牆固黨。以致人心解體。士氣不揚。叛兵至則束手無策。強敵來而先期以走。致令棗輿播遷。社稷邱墟。閣下謀國。

至此卽喙長三尺。亦何以自解也。以職上計。莫若明水一盂。自刎以謝天下。則忠憤節義之士。尙爾相亮無佗。若但求全首領。亦當立解樞權。授之才能。清正大臣。以召英雄豪傑。呼號惕厲。猶當倖望中興。如或消搖湖上。潦倒烟霞。仍效賈似道之故轍。千古笑齒。已經冷絕。再不然。如伯嚭渡江。吾越乃報讎雪恥之國。非藏垢納污之區也。職當先赴胥濤。乞素車白馬。以拒閣下。上千洪怒。死不贖辜。閣下以國法處之。則當束身以候。緹騎私法處之。則當引領以待。鉏覺。

復清多爾袞書

史可法

南中向接好音。法隨遣使問訊。吳大將軍未敢遽通。左右非委隆誼於草莽也。誠以大。夫。無。私。交。春。秋。之。義。今。倥。偬。之。際。忽。捧。琬。琰。之。章。真。不。啻。從。天。而。降。也。循。讀。再。三。殷。殷。至。意。若。以。逆。賊。尙。稽。天。討。煩。貴。國。憂。法。且。感。且。愧。懼。左。右。不。察。謂。南。中。臣。民。媮。安。江。左。竟。忘。君。父。之。怨。敬。爲。貴。國。一。詳。陳。之。我。大。行。皇。帝。敬。天。法。祖。勤。政。愛。民。真。堯。舜。之。主。也。以。庸。臣。誤。國。致。有。三。月。十。九。日。之。事。法。待。罪。南。樞。救。援。無。及。

師次淮上。凶問遂來。地坼天崩。山枯海泣。嗟乎。人孰無君。雖肆法於市朝。以爲泄泄者之戒。亦奚足謝先皇帝於地下哉。爾時南中臣民。哀慟如喪考妣。無不拊膺切齒。欲悉東南之甲。立翦兇讎。而二三老臣。謂國破君亡。宗社爲重。相與迎立。今上以繫中外之心。今上非他神宗之孫。光宗猶子而大行皇帝之兄也。名正言順。天與人歸。五月朔日。駕臨南都。萬姓夾道歡呼。聲聞數里。羣臣勸進。今上悲不自勝。讓再讓三。僅允監國。迨臣民伏闕屢請。始以十五日正位南都。從前鳳集河清。瑞應非一。卽若告廟之日。紫雲如蓋。祝文升霄。萬目共瞻。欣傳盛事。大江湧出。枻棹數十萬章。助修宮殿。豈非天意也哉。越數日。遂命法視師江北。刻日西征。忽傳我大將軍吳三桂。借兵貴國。破走逆成。爲我先皇帝后發喪成禮。掃清宮闕。撫輯羣黎。且罷薙髮之令。示不忘本朝。此等舉動。振古鑠今。凡爲大明臣子。無不長跽北向。頂禮加額。豈但如明諭所云。感恩圖報已乎。謹於八月薄治筐篚。遣使犒師。兼欲請命鴻裁。連兵西討。是以王師旣發。復次江淮。乃辱明誨。引春秋大義。來相

詰責善哉乎推言之。然此文爲列國君薨世子應立有賊未討不忍死其君者立說耳。若夫天下共主身殉社稷青宮王子慘變非常而猶拘牽不卽位之文坐昧大一統之義中原鼎沸倉猝出師將何以維繫人心號召忠義紫陽綱目踵事春秋其間特書如莽移漢鼎光武中興丕廢山陽昭烈踐阼懷愍亡國晉元嗣基徽欽蒙塵宋高纘統是皆於國讎未翦之日亟正位號綱目未嘗斥爲自立率以正統與之甚至如立宗幸蜀太子卽位靈武議者疵之亦未嘗不許以行權幸其光復舊物也本朝傳世十六正統相承自治冠帶之族繼絕存亡仁恩遐被貴國昔在先朝夙膺封號載在盟府寧不聞乎今痛心本朝之難驅除亂逆可謂大義復著於春秋矣昔契丹和宋止歲輸以金繒回紇助唐原不利其土地況貴國篤念世好兵以義動萬代瞻仰在此一舉若乃乘我蒙難棄好崇讎規此幅員爲德不卒是以義始而以利終爲賊人所竊笑也貴國豈其然往先帝軫念潢池不忍盡戮剿撫互用貽誤至今今上天縱英明刻刻以復讎爲念廟堂之上和衷體國介

冑之士。飲泣枕戈。忠義民兵。願爲國死。竊以爲天亡逆闖。當不越於斯時矣。語曰。樹德務滋。除惡務盡。今逆成未服。天誅諜知。捲土西秦。方圖報復。此不獨本朝不共戴天之恨。抑亦貴國除惡未盡之憂。伏乞堅同讎之誼。全始終之德。合師進討。問罪秦中。共梟逆賊之頭。以洩敷天之憤。則貴國義問。炤耀千秋。本朝圖報。惟力是視。從此兩國世通盟好。傳之無窮。不亦休乎。至於牛耳之盟。則本朝使臣久矣。在道不日。抵燕。奉盤盂從事矣。法北望陵廟。無涕可揮。身蹈大戮。罪應萬死。所以不卽從先帝者。實惟社稷之故。傳曰。竭股肱之力。繼之以忠貞。法處今日。鞠躬致命。克盡臣節。所以報也。惟殿下實昭鑒之。

與金正希書

史可法

老年臺之名在天下。無知與不知。皆能言之。若淮陰之距新安數百里。又受事有年。而高山之懷。發於寢寐。上林之鴈。不通數行。平生疎拙之臯。誠不可以擢髮論。以祁門三月之役。貴鄉諸生曾一通其巔末於淮上。而後知老年臺之忠孝爲不

可及也。當今之爲國家患者賊。而殺賊則兵也。兵能殺賊。則兵不能殺賊。而所殺非賊。則併不得爲兵。夫兵之不得爲兵久矣。至兵之假號爲援。勤爲勤。王而實快其虜。掠殺百姓之志。此憂時之士所以當食而放箸也。又況紆塗縱掠。明明賊之行徑。而欲責地方之不疑。何可得耶。前已有字致當事。乃其復弟者。以各兵自明其非賊。將馬匹器械一切交付。而地方於深夜圍而火之。弟亦正疑此舉之太過。及讀臺翰。則此語又似爲募兵官之故爲裝點也。臺諭云。與賊入而後有悔。毋寧禦之而後有悔。夫禦之一字。旣難言之。而悔之一字。尤難言之。今江北之民之蒙難者。歷十餘歲矣。苟其一心禦之。卽未必悔。苟不禦而卽悔。則亦必不禦。而以悔之置後。而禦之獨先。此固明哲之事。而何當事者之不見察也。老年臺身居苦塊之中。而力負疆場。志安桑梓。身任而不勞。怒至而不悔。慷慨激烈之氣。發於楮墨。灑灑累千百言。使人悚服。聖明在上。晦蠹之日。月何可不揭。中天而行也。大教謹一一心識之。弟法適以南樞員缺。謬膺簡命。今且揚帆次眞州矣。正值旁午。諸

不遑及。惟老年臺鑒之。嗣將另布。不盡欲言。

與雲間諸紳書

史可法

天禍家國。逆闖橫行。豫楚晉秦。所在淪喪。陵寢肆其蹂躪。黔黎聽其凋殘。用犀聖憂垂二十載。近者鴟張北向。犯闕無疑。法也聞之。五內震裂。夫西平許國。卽懷內刃之思。太真忘軀。遂灑登舟之涕。法雖迂疎淺陋。未敢遠附古人。而國難方殷。何敢或後。頃者誓師秣馬。以鼓勤王。而坐乏軍需。點金無術。徬徨中夜。泣下濡衣。且聞同仇者。臣子之心。急公者。烈士之義。獻牛十二。賈人之氣。猶雄指粟一困。朋友之交。以篤矧夫。冠裳大雅。正念在君。君辱臣死。於斯尤甚。伏見諸台臺。勵捐靡之。素志負報國之孤忠。雖潔身修行。或有心難自效。而毀家佐難。亦大義所不辭。儻邀慷慨之懷。爰下芻茭之賜。則社稷幸甚。天下幸甚。

與譚友夏書

金聲

弟之樸櫟。小大無當。謬承推獎。使人益慙。年來益復無似。惟學問一事。耿耿於懷。

恨不得勝師良友。日親時接。以此亦欲見翁兄。一罄區區之意。別有轉懇。爲死友劉與鷗。向爲一二嫉妬之人。豕鬼張弧。控持朝議。至今孤忠苦節。尙在隱現之間。弟念半爲此灰。念今天下文章一道。遠接古人。而可以必傳者。惟我翁兄。得借椽筆。一傳贊。一古風。與鷗死骨。可以不朽。人心蒙瞶。庶幾有瘳。與鷗存日。廩無儋石。家徒四壁。其沒也。老母孱妻。穉子弱弟。煢煢不自保。度翁兄篤念。不待弟詞之畢也。與鷗之歿。生平知交。誠多氣義。而路人視者。亦間有之。乃其聞風感懷。爲慷慨悲歌。痛若切身者。往往出於不相識面之人。惟翁兄諒其子弟無力自請之苦。而又恕弟因緣阻隔。不能爲與鷗匍匐躬懇之情。慨然執筆。幸甚。

寄母書

宋氏

女奉親命。使歸於沈良人。修德以刑家。饁耕相敬。白首靜好。是所願也。昊天不弔。奪其所天。倮然嫠婦。命之衰也。夫又何尤。藐諸遺孤。呱呱五月。冀其有立。繼詩禮而奉烝嘗。良人。不死矣。日有媒氏。儼然來臨。愕且媿。爲夫臣之事。君二心者。謂之。

賊婦之從夫。二天者。謂之淫。中流。柏舟。南山。磐石。亦已徵之。顏色告之。話言矣。而舅氏未察。雞鳴而出。或者哀其無依也。來謀諸父乎。母也。天只。明告以志。若舅姑。父母合志。同願。惟有蹈海而死耳。一身而事二人。九原可作。慙於心。泚於頰。女勿爲也。

上海文書局發行

文 學 書

趙雲崧	袁子才	現代	小倉	鈔本	影宋	海珊	王荆公	梁任公	胡適之	張南	小倉	魏叔宗	明清	明清
雲崧	子才	十大家	山房	陳后山	宋后山	珊詩	唐百家	公白話	之白話	南通	山房	三家	清六才	清八大家
崧	才	詩選	詩集	詩註	詩註	詩鈔	詩選	文鈔	文鈔	詩文鈔	文集	文合鈔	子文	文鈔
		二册	四册	六册	六册	二册	八册	一册	一册	一册	一册	四册	四册	八册
		三角五分	六角	二元二角	一元五角	四角	三元	七角	七角	六角	一元八角	六角	八角	一元六角
			有光紙	連史	連史						有光紙			
			十册	八册	八册						八册			

各省中華書局經售

上海文書局發行

當代名人尺牘

吳興 王文濡 輯選 全二冊 六角

著錄各名家一覽

梁任公 陳巢南 吳劍齋 朱劍芒 周仲穆 柳亞子 凌莘子 徐仲可 高吹萬 陳匪石 馮心俠 蔡心覺 歐陽竟無

章枚叔 馮君木 李審言 李鳳亭 邵次公 洪巢靈 徐希平 徐小淑 高天梅 傅鈍根 黃晦閣 蔣觀雲 潘力山

章行嚴 廖季平 王大覺 沈穎若 姚鶴雛 胡樸庵 徐病無 馬通伯 張揮孫 景毓華 葉中冷 劉今希 寶瑞臣

章鉅摩 蔡鶴卿 古公愚 沙孟海 姜杏癡 胡寄塵 徐半夢 馮錫吾 陳叔伊 程子大 蔡原清 蕭筱墅

尺牘雖小道出自名手便覺不凡本編所輯均係當代大文學家或議論時事或商量學問不特學識有異人處即行文亦俱有古文家法可作尺牘讀亦可作古文讀

各省中華書局經售



A541 212 0023 8005B

中華民國十六年九月出版
中華民國十六年九月發行

歷代名明代尺牘 (全一册)
家尺牘

每部定價洋三角五分



分售處

燕湖 煙台 鄭州 青島 東昌 徐州 蕪州 貴陽 長春 新加坡

中 華 書 局

北京 重慶 長沙 常德 衡州 保定 石家莊 漢口 武昌 沙市 南昌 九江 安慶 天津 張家口 濟南 開封 西安 成都

編輯者 吳興王文濡
發行者 文 明 書 局
印刷者 文 明 書 局
發行所 上海 棋盤街 文 明 書 局
發行所 上海 棋盤街 文 明 書 局

